

## **UQAFIQOO UFABA**

### **Naaru kambiqaaninnainaina**

### **Yoohaneena uqafiqoo ufafa.**

<sup>1</sup> Dauni kambiqaaninna ainainara Anutufa narí asaku mundirana Yisuna akooroommamufanoo mifa quandakinoo narí faiqi namu qiman-nimianifeera Yoohaneena kooroomma aminau. Asaku mundirafa maa ainainausara narí qangi-roo aqiqoofanoo qumureenoo Yisuna ainainira faiqi Yoohaneena kooroomma aminau.

<sup>2</sup> Yoohaneefa aiqama ainaina qafeemaruna faqa irimaruna faqa qangi-roo fannoo qimamuna aiqama maa papiqanaki kooroo inau. Maa ufana Yisufa asaku mundirafa narí akoona Anutuna anoona ufa Yoohaneena qimamufanoo akara ru-maqoo ufafa maa akarafa maridanoo.

<sup>3</sup> Faiqí moo fannoo maa akarana asaana rinafa asasiannoo. Maa tamummaqara ufana irisee eedoo qinausa misa asasifaranoo. Maa ufanaki-naa ainaina koorooinausa qusasaa kambiqainara maa ufana asaana rimariasa faqa eedoo qimari-asa faqa asasifaranoo.

*Qisauku dinni taikasee dinni ani qaara marasee maqusakinaasa amaana maqaki keeqee mariasa misa Yoohaneefa nimandoo ufafa.*

<sup>4</sup> Asia maqa maaqaki mariasa amaana maqa qisauku dinni taikasee dinni ani qaara mararanaki keeqee mariasa qinee Yoohaneesa akara rumannimaqaidaqa.

Anutufa ooqai marufa maqee faqa kaqi marifa kasooqaqee naaru faqa marianinafa nari afaarirana faqa nari asooarana faqa inni nimidanoo. Anutuna ufa irira qaari oorinni Anutuna maraquna namu qisauku dinni taikasee dinni qaara marasee mariasa miqi kai mandee Anutuna afaarirana faqa asooarana faqa inni nimidaqa.

5-6 Yisufa asauku mundirafa andeeqasee kooroo imarifa Anutuna ooqa faiqi kuqiranakiqari findifufa maa maqa maaqanakinaasa karaambaiqauqa uriqararafa marifa mifa faqa nari afaarirana faqa asooarana faqa inni nimidanoo. Mifa maasara amuqusammidanoo. Mifa nari kuqiranannai maasa mandainainakinaana idukunniseenoo maasa qumareeqeenoo nari akoona Anutuna aanaiqikirausa mariaqee qimaseenoo quqaqisaifaqa maridaqa. Anutuna asauku mundirana Yisuna afaaqa areenarana faqa afeeka faqa firaaqoo minaindi marianifeera.

7 Qafaafa, mifa Yisufa asuruki qumidanoo. Mina faaqaana raquramusa misa faqa kuqiranakiqari findifi qafeefaranoo. Maa maqa maaqanakinaa maqusa maqusa mariasa aiqama minara ikiraqeeqa soofaarifaranoo. Doo kuqaa uqanna miqifaranoo.

8 Anutufa uriqararafa karaambaiqa ooqai marufa maqee faqa kaqi marifa naaru faqa kaqi marianinafa nariara maaqi qidanoo. Qinee oosana aroo aukuana mariafanausa naaru taikara aukuana faqa kaqi marianausa

maridaqa.

*Yoohaneena afu pisipasamandoofanoo asauku mundirana Yisuna qafanau.*

<sup>9</sup> Yoohaneefa narí qafoo ainainna maaqi qimasee akara rinau. Qinee Yoohaneesa inni nifasausa nauraiqi maridaqa. Qinee innisaimbaqa Yisuna anoonufa qimannimunaqa nári unna Anutufa marifaqa kuqaa qira Anutunara nikooqaifaqa aupurarana faqa narirana faqa innisaimbaqa qimimariafaqa maraidaqa. Qinee faqa innee faqa Yisuna ququsaki marunausa maridaqa, maasa mina teeroo quqaranaki maraidaqa sia minara aupureeqa mina minniseeqa kaqi minaki doori runusee maraqa fidaqa, qinee Yoohaneesa Anutuna ufa faqa Yisuna koorooira anoonufa faqa qimannimafannanara Roomma maqannaasa qini karabusa rumbaranaki qisoofaqa maridaqa. Ooruku nammari qambaana Patamoosa afumaki Roomma maqanna karabusaki mariafananoo Yisufa oosana oosana ainaina kambiqaaninnanara qimaqiminau.

<sup>10</sup> Karaambaiqa qimaqoo faasaanna karabusaki mariafananoo amaanasaa Anutuna maraquina fannoo daakufufanoo inaaqianaindari firaa ufireena miqirafa faiqiara foora ufa qinau.

<sup>11</sup> Mi ufafa maaqi qimasee qimaqiminau. Yoohanee maqee uqafiqaanna ainaina anee papiqaki akara rumasee dinni qisauku taikasee dinni ani qaara marasee maqusanaasa nári

amaana maqakiaqa keeqee mariasa akara rumannimaqaa. Efeesusa maqusa amaana maqaki keeqee mariasa faqa Samirana maqusa amaana maqaki keeqee mariasa faqa Peerakamumma maqusa amaana maqaki keeqee mariasa faqa Tiatira maqusa amaana maqaki keeqee mariasa faqa Firadeerafia maqusa amaana maqaki keeqee mariasa faqa Raoodiseea maqusa amaana maqaki keeqee mariasa faqa miqimasee amaana maqanamuaara akara rumannimia.

<sup>12</sup> Mi ufana qimaqimisoofofaqa qinee yafee inaaqiannaindari qimaqimidanoo fee qimasee quandaki qafaafananoo rambi kuradee mari ainainausa qisauku dinni taikasee dinni ani qaara marasee marufanoo rambi aiqamasaa marida qeemarinau.

<sup>13</sup> Mi rambisa qambainai faiqiara foora kikiqinoo marufaqa qinee qafaqiafana. Mi fasiqana qamunna kisaqa karaambaiqa qamunna maqasaa qumumarufaqa qafaqiafana koora auqira raitanda karaambaiqaindi mina aradauqanna rumbanoo marinau.

<sup>14</sup> Mina akiqa asaasi qafeeqa eekara asausiara foora kaaqa eekara arinoo marinau. Mina afu fannoo idauru miqirafa qeemarinau.

<sup>15</sup> Mina aiku fannoo anukara barasara foora tandi tandimarinau. Mina ufa fannoo oondainni nammariara foora aiqanaiqana imarinau.

<sup>16</sup> Mina asaukuqannai asaukuki qisauku dinni taikasee dinni ani qaara marasee fasaunamu uaqee inau. Mina ookiqari qaseema miqirafa raiqarafa afaidarafa animarinau. Mina oori

afiri suani qambaanai ururee firaaqoo qaindee imarinau.

<sup>17</sup> Qinee mina qafamasee kaaqa rufiasee mina aramandunnai maqasaa aqufiqa kuqiara foora iqa mariafananoo nari asauku uqannai qinisaa munduseenoo qimaqiminoo qinau. Oo maa fasiqa sia rufiaa. Qinee indaarugaasa faqa inaaqianaasa faqa maridaqa.

<sup>18</sup> Qinee ooqai kaqi mariafanausa maridaqa, qinee kuquafanausa maridaqa doo qiqafa kaqi marunausa maridaqa naaru naaru marianausa. Qinee kuqiranara rakisirauusa uriqararauusa maridaqa mina kooqi kiqa uaqeeiunausa maridaqa kuqiranaki mariasa mandoosana mareeusa misa mariaqoo faqa uriqararauusa maridaqa mina kooqi kiqa faqa uaqeeidaqa.

<sup>19</sup> Yoohanee anee qafa qafeemarianna ainainna irimarianna ainainna aiqama papiqaki akara rua. Maqee qafeemarianna ainainna faqa kasooqagee kambiqaaninna ainainna faqa akara rua.

<sup>20</sup> Qini qisauku uqannai qisaukukinaa fasau qisauku dinni taikasee dinni ani qaaraqanda marasee fasau mina kukeeqarana oosana maaqimminoo maridanoo. Qisauku dinni taikasee dinni ani qaaraqanda marasee amaana maqasaa rakisimaria Paatoosa fasau maridaqa. Qisauku dinni taikasee dinni ani qaara marasee rambi kuradee maria ainainna mina kukeeqarana oosana maaqimminoo maridanoo. Maqusa maqusa amaana maqa mifa maridanoo. Qisauku dinni taikasee dinni ani qaaraqanda marasee amaana maqara qidaqa.

## 2

*Efeesusu maqusanaasara ufa Yisufa Yoohaneeenasa qimaqoo ufafa maridanoo.*

<sup>1</sup> Yoohanee anee Efeesusu amaana maqasaa rakisimari paatoona maaqi qimasee akara rumasee qimamia.

<sup>2</sup> Oo Efeesusu maqanna Paatoo dinni taikasee dinni ani qaara marasee fasau nari asaukuki uqirafa ni fasiqafa ani qimamidanoo. Qisauku dinni taikasee dinni ani qaara marasee rambi kuradee mari ainainna qambaanai nimari fasiqafa Efeesusu amaana maqasaa rakisimari paatoo maaqi qimasee qimamidanoo. Qinee anee auqee marianna saikana iridaqa anee kadaapiri mariannanara iridaqa anee sia feefauruara irisaidana maqee maqee kadaapiri marianaqa iridaqa. Anee mandoosana maree mariasara akooqee mariannanara qinee minara faqa iridaqa eedoo qidaqa. Akaqausa nariara unna qimasee Yisufa diqiqoo fasiqausee qufana anee misa faqa amanamasee qafoonanoo misa unna qirana anee paqurunafa mariananoo.

<sup>3</sup> Anee reendeenamasee miqoo kai fimarianafa mariananoo. Anee qiniara oosana oosana kadaapirirana marasee sia minnisaananoo kaqi marana fimariananoo.

<sup>4</sup> Akaqa ainainara kai aniara aaqeefoo qidaqa. Anee ooqai indaaru unandee sia qiniara amuqusidanoo.

<sup>5</sup> Ooqai muruqoo amiqiranaki mariunafa doo miaqoo qumuananoo. Inneeqa oosana quandaki ooqai undee kai iaqaana. Sia miqifaqa qinee

innee marinannai inni rambi mariqooqaraana maraanaqa innee doo imbeefara.

<sup>6</sup> Inniki moo oosanara qinee amiqira fee qidaqa. Nikooraita unna amaana ufara innee qini daanna raidaqa fidiagaammi mariafanoo. Nikooraita amaana ufa qimariasa aiqama faiqí faqa anaasee faqa moodaanaki maraqa nuafaqa innee misa ninda fee qini daanna ree fidiagaa imariasa mariafanoo.

<sup>7</sup> Anutuna maraḡuna fannoo amaana maḡaki keeqee mariasa aiḡamai qimannimidanoo. Naaqoo faḡaasa mina ufa kai iriaqa. Mandainainaki afeekaikamasee rakiranara foora maraḡa fifi inaḡa uriḡaree mariasa qinee misa qimannimianaḡa misa Anutuna innaaruna quḡusaki keeqafi innaarunai asumu marirana nimira saḡari ḡaḡamma neefaranoo.

*Samirana maḡusanaasara ufa Yisufa Yoohaneenasaa quḡoo ufafa maridanoo.*

<sup>8</sup> Miḡi qimaseenoo Efeesusa amaana maḡa Paatoonara ufa qimaseenoo quandakufanoo Samirana amaana maḡasa Paatoonara Yoohaneena qimaminau. Yoohanee anee Samirana amaana maḡasaa rakisimari Paatoona maḡi qimasee akara rumamia. Ooḡai indaarugaafa faḡa inaaḡianaafa faḡa ooḡai kuḡufa findifi kaḡi marifa Yisufa maa ufana ani qimamidanoo.

<sup>9</sup> Qinee inni kadaapiriranara iridaḡa innee maa maḡanasaa ainaina siaisa kudi mariafanoo innaarunai ainaina faḡaasa mariafanoo qinee iridaḡa. Sadannana faiḡi namu akaḡausa náriara

unna qimasee Yuda maqannaa fee qimariasa inniara mandufa oosana oosana qimariana qinee iridaqa.

<sup>10</sup> Qini ufasaara kaqikaa qoo innee aupurarana mareefaranoo innee sia minara rufiaaqa. Innee iriaqa Sadannafa inni nimanamasee qafaaneera karabusaki akaqausa quqaannoo. Inni nidafirafa maa maqanasaa qusasaa mariannoo. Innee kaqi maraqa fifi inaqa kuqirana paqurinna aukuaana qinee naaru marira qafee afisunnimaqaanaura.

<sup>11</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa. Andeeqara oosana kaqi maraqa fifi inaqa Sadannana nimanirana uriqararawsaiki mariasa inaaqianna kuqirafa sia misa naruannoo.

*Peerakamumma maqusanaasara ufa Yisufa Yoohaneenasaa quqoo ufafa maridanoo.*

<sup>12</sup> Yisufa miqi qimasee Samirana amaana maqa rakisiranara Yoohaneena qimamiseenoo quandakinoo Peerakamumma amaana maqasaa Paatoona maaqi qimasee qimaminau. Yoohanee anee Peerakamumma amaana maqasaa rakisimari Paatoona maaqi qimasee mina faqa akara rumamia. Qaseema dinni dinni raiqarafa ookiqari animari fasiqafa Yisufa maa ufana ani faqa qimamidanoo.

<sup>13</sup> Innee Peerakamumma maqusanaasa Sadannana amaana maqa mariqoo mariasa mariafanoo qinee iridaqa. Innee kuqaa qinisaa atooqee mariasa mariafanoo. Inni maqusai Sadannana amaana maqa mariqoo



miqooqaraasa qini qiqoondi moo fasiqa qini Yisusara andeeqasee kooroo qimarina akiaqara mina auqu Antipasana kuqa arufaqa innee sia minara rufioosa kaqi kai qini saqariki mariasa mariafanoo.

<sup>14</sup> Akaqa ainainara kai inniara aaqaidammi-afoo qidaqa. Inniki maqee Baraamafa ooqai mariu fasiqana aanna ree mariafanoo mi fasiqafa Baraamafa marufaqa inniki akaqausa mi oosanna maraidaqa. Ooqai Mooaba maqusanaasa karaambaiga fannoo Barakafa Anutuna tamummaqara fasiqa moo auqu Baraamana munnimma amiseenoo anee naukarara ufa Isaraee maqanna nimisainaqa kuquaga. Miqi qufanoo Anutufa Baraamanara qaoo qufanoo quandakinoo Barakana qimamufanoo Isaraee maqanaasa mindaraasa unna Anutuna oorisa naranara dufi dufi qimasee narana naidaqa mindaraa anaasee naafeeqee mariqau. Innee Peerakamumma amaana maqaki mariasa akaqausa Baraamana oosana maree mariafanoo.

<sup>15</sup> Miqi kai masee inniki Nikooraita amaana ufa irimariasa akaqausa mariafanoo.

<sup>16</sup> Innee inneeqa mandoosana kafa qandaaga. Sia quandaifaqa qinee innee mariaqoo anireeqa qeeqa dookiqari qaseemannai mi mandoosanna maree mariasa naruanauranoo.

<sup>17</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa iriaqa. Ooqai Isaraee maqannaasa aadana maqa maaqakinai nimarufaqa kananaana kananaana

innaarunaindaraa feemu nimiaafanausa maridaqa. Maa maqee mariaqoo mandainaina faqa rakiraridaqa mina uriaaqararausa qinee kukeeqara feemu innaarunai misa nimianauro. Eekara oonisaa nári fuka nuqu akara rirana moodaa kai moodaa kai nimianauro. Mi fuka auquna sia moo fannoo misa oosana iriannoo nári kai mina oosana iriannoo. Doo mi ufana Yisufa Peerakamumma amaana maqasaa Paatoonara Yoohaneena qimaminau.

*Tiatira maqusanaasara ufa Yisufa Yoohaneenasaa quqoo ufafa maridanoo.*

<sup>18</sup> Rambí kuradee maria saqarina qambaanai marifa Yisufa miqi qimaseenoo quandaki Yoohaneena kafaamaaqi qimasee qimaminau. Yoohaneene anee Tiatira amaana maqasaa Paatoonaa faqa maaqi qimasee akara rumamaqaa. Anutuna amaaku afu idara foora qeemarifa mina aiku faqa anukanoo mari barasara foora tandi tandi mari aikunannoo mandainaina radamimarifa Yisufa maa ufana inni qimannimidanoo.

<sup>19</sup> Innee Tiatira maqusanaasa qini Yisusara nimuqusidanoo qinee iridaqa, innee maqee maqee iriqa kai fimarianara faqa qinee iridaqa, innee qiniara iriseeqa inneeqa maqannaasa dadaaqimariafanoo. Innee sia kadaapi dari maqi qimasee minnisee mariafanoo kaqi maraqa fimarianara minara faqa iridaqa. Ooqai innee qini saika oodaa maree mariqau, maqee kamu firaqoo maree mariafanoo qinee minara faqa iridaqa.

<sup>20</sup> Qinee inni moodaa ainainara kai inni niqidaqa. Innee mi manda anaaseena Yeesebeera

nammarinara saina kaqi marianiffee qimariana. Mifa unna qimasee nariara Anutuna ufa maree marunausee qidanoo. Mi anaaseefa naakapaidanoo qini ufa irimariasa rarisameeqeenoo faiqí faqa anaasee faqa narí ummuari narí ummuariranaki quqaidanoo. Moo unna anutunara innaaru qimasaida narana neemarianaki faqa quqaidanoo.

<sup>21</sup> Qinee mi anaaseenara aneenna ummuariranakiqari quandaannee qimasee afeesunaisia maridaqa.

<sup>22</sup> Minara mina mareeqee narí rarisaganua fasiqausa saimbaqa manda qaarisaa quqasaanaura minaki maridaqa teeroo firaana maraida marifaranoo. Misa nári mandoosana sia aupuramasee quandaifaqa qinee dauni miqianaura.

<sup>23</sup> Qinee mi anaaseena ufa irimariasa faqa kuqa narusaanaqa amaana maqaki keeqee mariasa qini oosana irifaranoo. Misa qiniara kukeeqara ainainara irimari fee qiaqera naruanauranoo. Qinee aiqamausa nári nisaukunnai auqainnana akiaqara kai nimianaura.

<sup>24</sup> Innee Tiatira maqusanaasa sia mi manda anaaseena oosanna maroosa mariafanoo. Mina oosana mareemariasa Sadannana meemaqoo kukeeqara irirana irimariasa nariara unna qimasee akoofasa fee qidaqa. Qinee sia ummaara moo faqa innisaa quqaanaura.

<sup>25</sup> Maana kai qimannimidaqa. Inneeqa amiqira oosana uaqeeiana mina kai maramaree fuaqa, fifi inaqa qinee qumuanna aukuanna mina aki-aqara maraaqa.

<sup>26</sup> Rakiranara foora iqa mandainaina uraaqarararee imariasa qini ufamau fimariasa mi mau fifi inaqa taikara aukuaana paquriqa qini qikoofa afeeka qimuna quandaki misa nimianaura.

<sup>27-28</sup> Niminaqa kasoogaqee naaru misa moo maqannaasa urinaaqaramasee ainna faaqaanan-nai misa qafeera foora rukamifaranoo. Qinee iqaqara duqudeeqi faqa nimianaura.

<sup>29</sup> Anutuna maraḡuna fannoo amaana maḡaki keeqee mariasa qimannimidanoo naaqoo faqaasa mi ufana iriaqa.

### 3

*Saradisa maqusanaasara ufa Yisufa Yoohaneenasaa quqoo ufafa maridanoo.*

<sup>1</sup> Yisufa miqi qimasee Tiatira amaana maḡasaa rakisirana qimamiseenoo quandakinoo Saradisa amaana maḡasaa Paatoonara Yoohaneena qimaminau. Yoohanee anee maa ufana akara rumeeqeenana Saradisa amaana maḡasaa rakisira Paatoona amaḡaa. Anutuna maraḡuna dinni taikasee dinni ani qaaramarasee maraḡuna qumaree marifa dinni taikasee dinni ani qaaraqanda fasau qumaree marifa Yisufa inni Saradisa maqusanaasa qimannimidaqa. Qinee innee auqemarianara iridaqa. Misa unna qimasee inniara kasimariasee qiafaqa qinee inniara kuqimariasee qidaqa.

<sup>2</sup> Innee minara iriseeqa tauti findifuaqa nimuqusa kaḡikaqoo kasimariqoo kaaqa kuqifoora dauni findi fuaqa. Inneeqa Anutuna

saika maremariana Anutufa qafaidanoo mina afusaa sia anoonaidanoo minara qinee inniara tauti findifi fuaqee qidaqa.

<sup>3</sup> Innee ooqai qini ufa irimaria oosannara naaqoo irisee qini ufara faqa irisee eedoo qimasee mi mau fifanoo inneeqa mandoosana quandaqa. Innee sia faiqaranakiqari tauti findififaqa qinee ummuari mari fasiqafara foora tautumannimaqasee anireeqa naruanaura.

<sup>4</sup> Inniki Saradisa maqusanaasa akaqausa sia qikairi faisa maridaqa. Innee qikairi siaisa qini faqa nifaranoo. Inni amiqira marirana amana kai eekara gamunna afisunnimaqasaanaqa qini faqa fifaranoo.

<sup>5</sup> Mandainaina fannoo inni maqee maqee rafaqaqafimarifaqa mi manda ainainna uriqararausa inni naanna ramasee eekara gamunna afisunnimaqarara qidaqa inni nuqu faqa naaru kaqi marira papiqakinaana sia atekaanaura kaqi marianifeera qidaqa. Qinee qeeqa qikoona oorisa faqa mina qangiroo misa noorisaa faqa innee qikairi siaisara qini faiqi namu fee qianaaura.

<sup>6</sup> Anutuna maraquna fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa.

*Firadeerafia maqusanaasara ufa Yisufa Yoohanee nasaa quqoo ufafa maridanoo.*

<sup>7</sup> Yisufa miqi qimasee Saradisa amaana maqa Paatoona qimamiseenoo quandaki Firadeerafia amaana maqasaa rakisimarunara Yoohaneena qimaminoo qinau. Yoohanee anee maa ufana

akara rumeeqeenana Firadeerafia amaana maqasaa rakisira Paatoona maaqi qimasee amaqaa. Ooqai Dafidifa kooqi kiqa uaqeena qinee Yisusa maqee mina uaqeidaqa ani qimamidaqa. Qinee naaquqara andeeqarausa kuqaa anoona oosana oosana mareemarunausa maa ufana inni qimannimidaqa. Qinee kiqannai kooqi ititasaana sia amana moo fannoo atuarana amana maridanoo, kaifaa qinee kooqi atuasaanoo moo fannoo sia amana ititaannoo.

<sup>8</sup> Innee Firadeerafia maqusanaasara qinee inni aiqamausara amiqimasee iridaqa. Inni noorinni kooqi atuarana quqasaanoo moo fannoo sia amana mina ititaannoo. Inni afeeka kaqikaafa maridanoo innee qini naakapara ufamau fimari-asa mariafanoo. Innee maqee maqee qiniara kai iridaqa mariasa mariafanoo.

<sup>9</sup> Iriaqa, Sadanna faiqi namu akaqausa mari-asa náriara unna qimasee Yuda maqanna fee qimasee qimariasa qinee misa mareeqee inni niramandunnai quqasaanaura. Aiqamausa mina qafeeqa oo Yisufa inniara amuqusifanoo miqidanoo fee qiaqeera.

<sup>10</sup> Qinee inniara reendeenamandee mariaqee qiafanaqa innee miqi mariasa mariafanoo. Miqi mariana akiaqara firaa teeroo maaqanna maaqanna nimanamasee qafaanaura miqianna aukuanna qinee inni mareeqee kaqi atinnai quqasaana asumu marifaranoo.

<sup>11</sup> Qinee qusasaa qumuanaura. Innee uriqaraqa mariana amiqimmandee rakisi qumaraaqa moo fannoo qumaraandoora.

<sup>12</sup> Maa maqanasaa mandainaina qambaanai

uriqararana qinee mina qumareeqee qeeqa qikoona amaana maqaki quqasaanoo mifa faakanaikinoo mariannoo. Qinee mina afaaqasaa qeeqa qikoona Anutuna auqu quqaanaura, qeeqa Anutuna firaa maqusa fuka Yeerusaree auqu faqa mina afaaqai quqaanaura. Mi maqusafa innaarunaindari qini Anutufinnainadari kasooqagee qumuannoo. Qinee qeeqa fuka duqu faqa mi fasiqana afaaqai quqaanaura.

<sup>13</sup> Anutuna maraquna fannoo aiqama maqusa amaana maqaki keeqee mariasa qimannimidanoo. Naaqoo faqaasa mi ufana iriaqa.

*Raodiseea maqusanaasara ufa Yisufa Yoohaneenasaa quqoo ufafa maridanoo.*

<sup>14</sup> Yisufa miqi qimasee Firadeeraflia amaana maqasaa Paatoonara Yoohaneena qimamiseenoo quandaki Raodiseea amaana maqasaa rakisiranara qimaminoo qinau. Yoohanee anee Raodiseea amaana maqa rakisira Paatoora faqa maaqi qimasee akara rumamia. Qinee mapukusee marunna fasiqausa Yisusa inni qimannimidaqa. Qinee naaru naaru kuqaa anoona ainaina kai qimarunausa inni qimannimidaqa. Anutufa aiqama ainaina auqimaruna oosana qinee marunausa inni qimannimidaqa.

<sup>15</sup> Qinee innee auqee maru ainainnara iridaqa. Innee sia suaru qiqa mariafanoo innee sia idaidiqa mariafanoo Inni oosana amiqirafa marinaqau kaifaa minara faqa irini.

<sup>16</sup> Inni oosana suanisaa nammariara foora nannoo ididi marifaqa fididaqa.

17 Innee unna qimasee inneeqara aiqama ainaina oosana oosana faqaasee qimariafanoo. Inni nifaaqa rumbanoo marifaqa mandaikidaqa kudoosaapaqa maridaqa innee sia minara iri-mariafanoo. Innee kudi mariafanoo nifu qim-barausara foora mariafanoo kaqisamuara foora mariafanoo.

18 Qinee maaqi qimasee inni naamua qidaqa, innee qini koora munnimmara foora feefaurumaseeqa minannai naundurakinaa qumiasana moomoo maraaqa. Innee qinisaaqaraa andeeqarana feefaurumasee eekara qamunnara foora marasee inneeqa nisaurirana manda nifaaqasaa afisuaqa. Inneeqa nifu marasinna minniseeqa qini marasinnara foora feefaurumasee inneeqa nifusanara foora narimarinaki akusaifanoo inni nifu amiqiani.

19 Qinee nimuqusi maria fasiqa anaaseera kai mandainainaki keeqaafaqa qaoo qimasee nari-daqa. Innee minara irisee kuqaa noori runusee inneeqa marirana quandaqa.

20 Iriaqa qinee Yisusa faiqi nimuqusa kooqi afaisaa kikiqammambiqa kooqi atuaannee qimasee kukusidaqa. Faiqi moo fannoo qinee kukusiannana irinoo nari kooqi atuqainaqa qinee mina amuqusa ooki keeqafiqa mina faqa naanaura mifa qini faqa naannoo.

21 Qinee maa maqanasaa mandainainakiqari uriqararausa maridaqa qeeqa qikoosandiri nari rakisira qaarisaa ooqufaagee idaqa. Maa maqanasaa mandainainakiqari rakirara foora uriqarainafa mifa miqi kai inoo qinee rakisira qaarisaa innaaruna ququsaki qini faqa



ooqufaaqee mariannoo.

<sup>22</sup> Anutuna maraquna fannoo aiqama maqusa amaana maqaki keeqee mariasa qimannimidanoo. Naaqoo faqaasa mi ufana iriaqa.

## 4

*Innaarunai mariasa Anutuna amooqida asasi-maria ufafa.*

<sup>1</sup> Qinee Yoohaneesa mi ufana irunanoo qifu pisipasifaqa moo ainaina qafeeqa. Innaarunai kooqiara foora atuanoo marifaqa qafeeqa. Minakiqari moo fannoo qimaqimifaqa iriqa mina ufa fannoo qufireena miqirana fuaqaidanoo miqidanoo qimaqiminoo anee mai ururainaqa kasooqaaqee kambiiqaaninna ainainna uqafiiqaanaura.

<sup>2</sup> Miqi qimasoofoo Anutuna maraquna daakufufaqa kooqiki keeqaki innaarunai ooru fiqiafana. Ooruree qafaafananoo ufa irira qaari ufiqiranasaa moo fasiqa marufaqa qafaqia. Mi fasiqafa Anutufa marinau. Mi qaarifa sia kaiqeesa qaari Anutuna nari rakisimari qaarina marinau.

<sup>3</sup> Mi fasiqafa Anutuna oori afiri pupu ooniara foora ooriki takunasoosa imarinau. Oondanda amiqirafa rakisimari qaarina ufiqirana fiq fiq inoo marinau.

<sup>4</sup> Mi qaarina ufiqirana atiqara moodaa fasiqa aiku asaku taikasee moo fasiqa asaku qaara faqa qaara faqa oonu marasee fasiqauqa nariqa rakisimari qaarinasaa fiq fiqumma ooqu mariqa mariqau. Misa aiqama uriqararawsa koorannai auqira qafee faqaasa eekara qamunna

afisirausa nariqa qaarisaa Anutuna fiq u fiq u mafi ooqu marifi mariqau.

<sup>5</sup> Anutuna rakisimari qaarina qambaanaindari aakuusaa faqa innaarunai qirana faqa darara qirana faqa ruruqirana faqa qaari qambaanaqari ururoofaqa qafaqiafana Anutuna oorinni qisauku dinni taikasee dinni ani qaara marasee qoomanamu Anutuna oorinni qeemarufaqa qafaqiafana. Mi qoomausa Anutuna maraqunauqa marufaqa qafaqiafana.

<sup>6</sup> Anutuna oorinni ooruku nammari miqirafa tanukara foora mandinoo marinau. Mi nammari-nasaa sia kaqikaqoo dumuna qaisoora marinau amiqirafa uqanna marinau. Anutuna rakisira qaari dinni qaaraqanda dinni qaaraqanda aandaau marinau. Noorinni faqa nitaufakai faqa aigama nifaaqasasa nifu moomoo marinau.

<sup>7</sup> Moo fannoo raioona kaasau pusina fooqaafa firaatia marinau moo aandaau burimakau aanaaqi miqirafa marinau moo aandaau faiqi noorikira aandaau marinau moo aandaau quqaumu miqirafa aqoosa faqaafa marinau.

<sup>8</sup> Mi aandaau namusa qisauku dinni taikasee dinni ani moodaa marasee niqoosa faqasaa mariqau. Mi namusa nifaaqasasa faqa naunduraki faqa nifu moomoo marinau. Mi namusa eendaki faqa faasaana faqa idi raida kai mariqau. Misa maaqi qimasee idi ree mariqau.

Anutufa karaambaiqa afeeka uriqararafa naaquqarafa naaquqarafa naaquqarafa.

Ooqai marufa maqee marifa kasooqaqee marian-inafa maridanoo.

<sup>9</sup> Mi qaara faqa qaara faqa aandau namusa qambaana Anutuna rakisinnimaqee maru qaarinasaa dinni dinni mariasa maqee maqee Anutunara idi ree marusa mariqau. Misa qaari qambaana maruna Anutunara naaru naaru marianinnanara dufi dufi qira idi faqa mina auqu uqeerara idi faqa mina areenaranara faqa idi ree marusa mariqau.

<sup>10</sup> Mi andaunamusa idi ramasoofaqa fiqumma marusa moodaa fasiqa aiku asauku taikasee moo fasiqa oonu qaara faqa qaara faqa marasee uriqararausa nári koorá auqira qafee uturuqu quqasee noorindari maqasaa Anutuna oorinni kummarammafufaqa mina amooqimasee maaqi qimasee qimamiqau.

<sup>11</sup> Oo Karaambaiqa Anutufa anee amiqirafa.

Anee amana areenarana faqa amooqirafa faqa afeeka faqa amana mareennaranoo.

Anee aiqama ainaina auqunafa.

Aneenna iriranannai marirana faqa kasirana faqa nimunafa marianafa mariananoo.

## 5

*Rumbarauru papiqa faqa Anutufa aruaninna sipsipa anaqiara faqa qu ufafa.*

<sup>1</sup> Misa idi ramasoofaqa rakisinnimaqee maru qaarina qambaana marunna Anutuna asaukuki mifa papiqa kukuqirana asauku uqannai marufaqa qafaqiafana. Mi papiqana aunduraki faqa adisaa faqa akara marufaqa qafaqiafana. Sanda rumbarafa qisauku dinni taikaseenoo dinni ani

qaara maraseenoo mi papiqana qambaana qambaana rumbanoo marufaqa qafaqiafana.

<sup>2</sup> Qinee miqoo qangiroo moo qafaqia amudaanai qimarufa afeeka qafamasaafananoo firaa kari nameera qinoo qinau. Yafee moo fannoo andeeqarafa marinafa maa sandausa rakeemaseenoo fee papiqa qairisee asaana ruannoo fee.

<sup>3</sup> Misa innaarunai faqa maqasaa faqa maqa ameemaanai kuqirausaki faqa randaafanoo sia moo fannoo amanaikinoo mi papiqana sanda rakeemaseenoo qairisee asaana ruaqaainoo marufaqa qafaqiafana.

<sup>4</sup> Qinee Yoohaneesa mi papiqana qafammasee ikiraqeeqa sia moo fannoo andeeqarausa amana mariafaqa qinee qafeeqa firaqoo ikiraqiafana.

<sup>5</sup> Ikiraqee mariafananoo uriqararausakiqari moo fannoo qimaqiminoo qinau. Sia ikiraqaa afu qafaa Yakooboona faiqi namukiqari Yudana aiku asaukukiqari moo fannoo raioonara foora aiqama mandainaina urinaaqararafa Dafidina ati firaa auqu faqaafa mifa amana mi sandausa rakeemasee qairisee asaana ruannoo.

<sup>6</sup> Miqi qimasooafaqa qinee qafaafananoo sipsipa aanaaqi fooqaafa Yisufa Anutuna qaarisaa kikiqinoo marufaqa qaara faqa qaara faqa aandaau faqa moodaa fasiqa taikasee moo fasiqa qaara faqa qaara faqa marasee uriqarara fasiqauqa faqa Anutuna qaari atiara fiqum fiqum iqa marufaqa qafaafananoo. Sipsipa aanaaqi qambaanai marinau. Mi sipsipa aanaqifa kuqufa kuqiranakiqari findifinoo marufaqa

qafaqiafana mina aanai dinni qisauku taikasee dinni ani qaara marasee aanai kambiqanoo marufaqa qafaqiafana mina afu qisauku dinni taikasee dinni ani qaara marasee marufaqa mi afunamusa Anutuna maraƣuna namu aiƣama maqa maaƣai Anutufa niƣiqoofaqa nimarusa nindafaqiafana.

<sup>7-8</sup> Mi sipsipa anaaƣifa Yisufa ƣambaana ƣaarisa Anutuna asauku uƣannai uageeu papiƣana marasoofaqa aandau namu faqa uriƣararawsa fiƣu fiƣumma marusa faqa aiƣamausa mina aramandunnai noorindari aƣufufaqa idi moo fuka raƣau. Idi raidaqa piripuna arimarufa dinni nisaukuki marinau kooraa auƣimaru ƣafeesa dinni nisaukuki marinau amiƣira afundi maru ainainausa mi ƣafeesaki marinau, maaƣanna maaƣanna Anutuna ufa irimariasa innaaruƣirafa mi ƣafeesaki mi amiƣafundi maru ainainausa kikiƣa usinoo marinau.

<sup>9</sup> Misa fuka idi maaƣi ƣimasee raƣau.

Oo Yisufa sia moo fannoo amanaikiannoo anee aneenna andeeƣaranannai kai aneenna akoona asaukukinaana papiƣa marasee idukinnaranoo.

Misa ani arusoofana aneenna kuƣiranannai faiƣi feefaurummeeƣeenana Anutuna asaukuki ƣuƣanau.

<sup>10</sup> Aiƣama kaƣikaa maƣannaa faqa firaa maƣannaa faqa akaƣausa aneenna fidikannai feefaurummeeƣee Anutuna asaukuki aanaiƣikiranaki ƣuƣoonafa

kasooqaaqee miqooqari misa maa maqanasaa uriqararaisai kifaranoo.

11 Qinee Yoohaneesa mi idina roofaqa irisee uqeerafi nindafaafanaqa qangiroo moomoo nukudara foora kikiqiqa mariqau. Aandau namufaqa uriqararaisa namufaqa Anutuna rakisira qaari fiqumma kikiqiqa marusa ninaaqiannai nukudara foora qangiroouqa moomoosa fiqumma mambufaqa miqoo marusa aiqamausa idi moo raqau, firaa kari maaqi qimasee raqau.

12 Oo sipsipa aanaaqi anee faiqi arunaki reen-deenamasee keeqoonafa ani andeeqarafa kai amanaikinoo marinara Anutufa uriqararana faqa ainaina moomoo faqa irirana firana faqa afeeka faqa auqu uqeerarana faqa areenarana faqa ani amooqirana faqa ani Yisuna amiannoo.

13 Misa mi idina ramasoofaqa kafa iriseeqa aiqama innaarunaindaraa ainaina faqa maqasaa ainaina faqa ooruku nammarikinaa ainaina faqa maqa ameemaanaindaraana faqa aiqamai Anutufa auquqoo ainainausa moodaanakikammambiqaa maaqi qimasee idi raqau.

Qaarisa ooqu marinoo marifa sipsipa aanaaqi faqa inniqara nimooqirana faqa nuqu uqeerarana faqa areenarana faqa afeeka faqa naaru naaru innindi marianifee qidaqa idi raidaqa.

14 Misa miqi qimasee idi roofanoo qaara faqa qaara faqa aandau namu misa roo idina irisee kuqaa fee qufaqa miqoo uriqararaisa marusa

noorindari maqasaa rupaitamafufaqa Yisuna amooqimamaqaqau.

## 6

### *Papiqa rumbarauru idukunara qu ufafa.*

<sup>1-2</sup> Miqi qimasoofoo sipsipa aanaaqi fannoo mi papiqana kukuqirana qumareenoo moo sanda rumbaqaona idukinau. Idukusoofanoo Anutuna aaqa qaara faqa qaara faqa aandau mariunakiqari moo mina ufa fannoo innaarunai miqirafa darara qimaseenoo qimaqiminau. Anee aniannee qufaqa qinee Yoohaneesa miqoo oonuraafananoo qoosa moo eekara arirafa marinau. Faiqi minasaa ooqufaaqeeu fasiqafa duru faqaafa marinau. Miqooqaraasa qafee afisuamaqasoofoo maaqanna maaqanna rakiranannai narí aramandunnai quqararee qimasee finau.

<sup>3</sup> Mifa fufanoo sipsipa aanaaqi mi papiqana sanda moo rumbarana idukinau. Idukusoofanoo Anutuna aaqaqari aandau moo qiniara aniree qafaannee qinau.

<sup>4</sup> Qinee oonu qafaafananoo qoosa moo taatuqee arirafa animarinau. Miqooqaraasa qaseema firaana raigarana mi qoosanasaa maruna amisee qimamiqau. Anee ooqu maqasaaqaraasaki maa qaseemanannai nirana fundakinaqa rakirana uqeera niminaqa narí ari narí ariaqa.

<sup>5-6</sup> Mifa fufanoo mi papiqana rumbarana sipsipa aanaaqi fannoo moo sanda idukinau. Idukusoofanoo Anutuna aaqaqari aandau

moo findifinoo qiniara aniannee qufaqa oonu qafaafananoo qoosa moo runduqarirafa marinau. Mi qoosanasaa marufa sikeera uqusee marufanoo Anutuna aagaqari aandau moo ookiqari ufara foora mi fasiqana qimaminau. Aandaroo aukuana maridanoo moodaa faasaana saikiana amana kai raisa nimia. Raisa sia marinaqa kamaa miqi kaimmasee rainasee nimia. Misa fadameena faqa nammari faqa sia anee mina arua saina kaqi nimia, narana ainaina kai aandaroo naruannoo.

<sup>7</sup> Miqi qimasoofanoo sipsipa aanaaqi mi papiqana rumbarana moo idukusoofanoo Anutuna aagaqari aandau moo fannoo qiniara aniree qafaannee qinau.

<sup>8</sup> Qinee Yoohaneesa irisee oonuraafananoo qoosa moo afaaqa eeqaku arirafa marinau. Mina ataufakaaqa maruna auqu Kuqirafa marinau. Faiqi nimana madikakinaasa faiqiara fooqiara mi fasiqana faqa fidanoo nari dadaaqi nari dadaaqi mariqau. Miqoo innaarunai marusa maqi qimasee qimamiqau. Innee qoosa faqa faiqi faqa faiqi nimana madikakinaasa faqa maqasaa fasiqaki ooquree duru feefannai faqa aandaroonnai faqa auriranannai faqa kaasau aandaunnai faqa moomoo fasiqa anaasee maqusa maqusa mariasa narida mariaqa.

<sup>9</sup> Misa fufanoo sipsipa aanaaqi mi papiqanasaa rumbarana moo sanda idukinai. Idukusoofaqa qinee miqoo aandau tatufimaru qaindana marufaqa qafaqiafana. Mi qaindana ameemaanai kuqirausa nimana moomoo marufaqa qafaqiafana. Sia fifau kuqirausa



mariqau. Maqasaa maridaqa Anutuna ufa andeeqasee faiqí anaasee qimannimunara mina akiagara narusoosa kuqíqa mariqau. Misa oosana Anutuna ufamau kai fimarunara minara narusoofanoo Anutufa misa nimana mareeqeenoo innaaruna qainda ameemaanai quqanau.

<sup>10</sup> Qinee Yoohaneesa qafeemariafanaqa firaakari mindari Anutunara nameera qíqau. Oo uriqarara karaambaíqa anee andeeqarafa naaquqarafa anoona ufa kai qimarianafa mariananoo. Yairee fee maqasaaqaraasa ufa iriseenee maasa daruana akiagara nári narinnaree.

<sup>11</sup> Miqi qimasoofaqa innaarunai marusa eekara qamunna marasee aiqama nimisee qimannimiqau. Innee maana afisusee kafa miqoo kaqíkaaqqoo idooaaqa. Inni nikaqaafasaa maqasaaqaraasa inni naanna reeqa Anutuna ufasaara kuqifanoo Anutufa mikari inni ufa faqa misa ufa faqa iriannoo.

<sup>12</sup> Miqi qimasoofanoo sipsipa aanaaqi mi pa-piqana rumberana moo sanda idukinau. Iduku-soofanoo maqa firaqqoo uqanna kasinoo suani afu arusoofanoo runduqarira qamunnaikinoo marinau. Quqoona faqa aiqama taatuqee arinoo fidikandandinau.

<sup>13</sup> Fasau saqari qaqqamma miqirafa ufai uqifanoo adusa aiqama maqasaa kakasidanoo aiqama fasau maqasaa kakasinau.

<sup>14</sup> Innaaruna kudimanda fannoo papiqa fooqaana atindari raqandaamamaree mafi aiqama raqandaamma taikanau. Aaqana aaqana

nári maruqooqari nári maruqooqari moosa minifi mafi quqaidanoo ooruku nammariki afumauga faqa miqi kaimminau.

<sup>15-16</sup> Miqimarufa maqasaaqaraa karaambaiqauqa faqa uriqararausa faqa sundiaki kiateenauqa faqa ainaina faqaasa faqa nimudaanai qimarusa faqa faiqí aiqama karabusara fooqaana ainaini mariasa faqa kaiqeesa faqa aaqanasaa maru ooni aamaranaki keeqafi kukeeqafiqa aaqanara faqa ooniara faqa nameera qimasee qiqa. Innee maasasaa aqufiqa maasa dariqa kukeeqaqimaqaaqa. Qaarisaa ooqumarinoo marina afusaara rufiidaqa ititaqimaqaa. Sipsipa aanaaqi aanooqiranasaa faqa ititaqimaqaa.

<sup>17</sup> Miqanda firaa aanooqira faasaana doo animaridanoo, sia moo fannoo amana misa nifusaa kikiqiannoo.

## 7

*Isaraee maqannaa faiqí oosana oosanakiqara Anutuna akara niqinisaa quqarausara qu ufafa.*

<sup>1</sup> Qinee Yoohaneesa mi ainainna qafammasaafanausa kafaa maa ainainna qafeeqa. Qangiroom qaara faqa qaara faqa safasa ati atisaa kikiqiqee maridaqa miqiqa maridaqa ufai maqasaa maqee maqee uqimari ufaina maqa maaqa mandaikianiffee qimaseeqa ufai rafaqafiisee maridaqa. Miqiqa mariafanoo sia ufai moo fannoo ooruku nammarisaa fee maqasaa fee saqarisaa fee sia fuaqeenoo.

2-3 Misa miqiqā marufaqa qinee qangiroo moo qafaqiafana. Qangiroo moo fannoo suani oosana qaanaindari kaqi marira Anutuna akarainaina uqirafa anireenoo ufai rafaafimaru qangiroosa naaramasee qimanniminoo qinau. Anutufa inniara ufainnai maqa faqa ooruku nammari faqa mandaikamma nimaqaannee qifaqa eekaa kaqikaa qoo kaqi marifaqa qinee Anutuna ainainira faiqiuqa niqinaaqa Anutuna akara rumasaanaga miqoo maqa faqa ooruku nammari faqa saqariuqa faqa ufai quqasaifanoo firaqoo uqinoo mandaikamannimaqaani. Mi qangiroofa miqi qimasoofaqa Anutuna faiqi namu maqasaqaraasa niqinaaqa akara rumasoofanoo moo fannoo asaana rumasee kooroomasee qimaqiminoo qinau.

<sup>4</sup> Isaraeena aiku asaukikiqari aiqama moodaanaki quqaseenoo wan handareeta faqa footi maqi tauseenna faqa (144,000) fifau nukudara foorammiga mariqau. Miqimasee marunaki mi namusa kai niqinaaqa akara rumannimaqaseenoo Anutunaindi marifanoo ufai fannoo sia naruanifeera rumannimaqanau.

<sup>5</sup> Isaraee maqaanna faiqi namu niqinaaqa akara rumannimaqagoosa misa naadu naadu oosaa oosaa kai mariqau. Yudana aiku asaukikiqari (12,000) tueerufa tauseenna moomoo Anutuna akara niqinaaqa rumannimaqanau.

Reeubeenana aiku asaukikiqari (12,000) tueerufa tauseenna moomoo Anutuna akara niqinaaqa rumannimaqanau.

Kadana aiku asaukikiqari miqi kai maseenoo 12,000 rumannimaqanau.

<sup>6</sup> Aseerana aiku asaukukiqari miqi kai masee 12,000 akara rumannimaqanau.

Napatarina atiuqa marusa miqi kai masee 12,000 akara rumannimaqanau.

Mannaseena aiku asauku marusa miqi kai masee 12,000 akara rumannimaqanau.

<sup>7</sup> Simeeona atiuqa marusa miqi kai masee 12,000 akara rumannimaqanau.

Reefina aiku asauku marusa miqi kai masee 12,000 akara rumannimaqanau.

Isakeena atiuqa marusa miqi kai masee 12,000 akara rumannimaqanau.

<sup>8</sup> Seeburuna atiuqa marusa miqi kai masee 12,000 akara rumannimaqanau.

Yooseefaana aiku asauku marusa miqi kai masee 12,000 akara rumannimaqanau.

Beensaminna aiku asauku marusa miqi kai masee 12,000 akara rumannimaqanau.

Miqimasee mi qangiroofa Isaraeena aiku asaukukiqari moodaanaki mara ruqaumaseenoo 144,000 fifau nukudara foora Anutuna akara niqinaaqa akara rumannimaqanau.

*Aiqama aanaamuru Anutuna oorisaa suqu ufafa.*

<sup>9</sup> Qinee Yoohaneesa mina qafamaseeqa qandaki qafaafana moo suqirafa marinau faiqí anaasee firaaqoo qusimariqau. Sia faiqí moo fannoo nisaanarirana amana moomoo uqanna mariqau. Misa aiqama firaa maqannaasakiqari faqa kaqikaa maqannaasakiqari faqa aiqama fasiqa anaaseekiqari faqa aiqama ufakiqari faqa Anutuna qaari oorinni sipsipa aanaaqi oorisaa

aiqama ufa qimarusa kikiqammafiqau. Misa qamunna eekara afisirausa aufaqa saqari asaana uqirausa Anutuna oorisaa kikiqiqau.

<sup>10</sup> Miqoo kikiqiqā maridaqa maaqi qimasee Anutunara firaa kari qimamiqa qiqau. Maasa Anutufa rakisira qaarisaa ooqumarifuananoo sipsipa aanaaqi faqa anisaaqaraana kai maasa naaru marirana maridaqee qiqau.

<sup>11</sup> Miqi qimasoofaqa uriqararausa Anutuna rakisira qaari atimau fiq fiq iqa marusa faqa qaara faqa qaara faqa aandau marusa faqa marufaqa misa fiq fiq iqa maru qangiroosa misa kai maqasaa noorindari aqufufaqa Anutuna amooqiqā qiqau.

<sup>12</sup> Kuqaa amooqirana faqa areenarana faqa irirana faqa dufi dufi qirana faqa auqu uqeerarana faqa uriqararana faqa afeeka faqa naaru naaru maasa Anutunaindi kai maridaqa. Kuqaa fee qiqau.

<sup>13</sup> Qaari fiq fiquqiranakiqari uriqarausakiqari moo fannoo quandaki qini Yoohaneesa iramirinoo qinau. Maa fasiqa anaaseesa yaindaraasee eekara qamunna afisirausa aiqama ufa qimarusakiqari ani maridee qufaqa qinee qiqi-afana.

<sup>14</sup> Sia qinee iridaqa anee qimaqimia qiafananoo mifa kooroo qimasee qimaqiminau. Maa fasiqa anaaseesa Anutuna ufamau fimarusa minasaara narirana maree marusa minakiqari amiqimasee ani marusa maridaqa. Misa nári ikairi aanaaqi qamunna sipsipa aanaaqi Yisuna fidikaki nári qamunna nammuruqusee eekara arufifaqa afisusee maridaqa.

<sup>15</sup> Minara misa faasaana faqa eendaki faqa Anutuna naaquqara maqaki nari rakisinnimaqee maru qaarina oorisa kikiqammambi eendaki faqa faasaana faqa amooqidaqa. Qaarisaa marifa Anutufa nari kai misa ititannimaqaannoo.

<sup>16</sup> Ititannimaqaidanoo sia kafaa misa naara raannoo, sia nammariara nidiannoo, sia suani ididirafa nifaaqai naruannoo.

<sup>17</sup> Sipsipa aanaaqi rakisira qaari qambaanai marifa mifa misa rakisirafa marinoo misa nifiqee munusainaga kaqi marira nammari maqakiqari radiqisee ururee mariqoo neefaranoo. Anutufa misa naukunu rukasaina misa ikiraqarafa taikaannoo.

## 8

### *Papiqa moodaa sanda doo iduku ufafa.*

<sup>1</sup> Sipsipa aanaaqi fannoo mi papiqanasaa rumbara sanda inaaqianaana idukusoofanoo innaarunai qiqi ufa daiqimafinoo kaqikaqqoo ka-soomafinuu.

<sup>2</sup> Ufa sia qirafa taikasooqafa kafaa qinee Yooha-neesa qafaafananoo qangiroom Anutuna afusaa kikiqammambi marusa dinni qisauku taikasee dinni ani qaara marasee miqimandee qangiroom ukeena moodaa kai moodaa kai amana kai misa nimiruu.

<sup>3-4</sup> Nimisoofanoo qangiroom moo fannoo koora auqimaru qafeena uqirafa anireenoo Anutuna aandau tatufimaru qaandana oorisa kikiqammambinuu. Faiqi anaasee innaaru qirafa mi qafeenaki maruna maree anirooqafa misa amiqira afundimaru ainainna

moomoo mi qafeenaki innaaru qirana namufaqa quqasoofanoo Anutuna oorinni maru qaindanasaa koora auqimarunasaa idara qoonaki teeqimasoofanoo idaqaenoo amiqira afundimaru ainainna faqa faiqi anaasee Anutuna ufamau fimariasa innaaruqirana faqa idaqaofanoo amiqira afunda fannoo Anutuna aikiambuinau.

<sup>5</sup> Qangiroo mi qafeena qumareenoo mi qaindanasaaqaraa ida auri maru qafeenaki afeeriqi quqaseenoo innaarunaindari maqasaa teeqimmaqinau. Teeqimmaqusoofanoo innaarunai qirana namufaqa aakuasaa uqirana namufaqa maqa kasirana namufaqa kambiqanau.

*Dinni ani qaaraqanda marasee ukeena fuaqoo ufafa.*

<sup>6</sup> Miqooqari qangiroo qisauku dinni taikasee dinni ani qaara marasee ufireena faqaasa fuaqarara deedaqiqau.

<sup>7</sup> Fuaqasoofanoo pupusamu faqa ida namufaqa fidika namufaqa moodaanakikirafa innaarunaindari maqasaa teeqinau. Teeqimasoofanoo maa maqa maaqanaki qaaramooki oosuseenoo moodaaki idaqaama taikanau, saqari faqa miqoo marinauqa moomoo qamataikanau. Aiqama andanda faqa miqoo marinauqa qamataikaseenoo qaaraqandaki kaqi marinau.

<sup>8</sup> Qamataikasooofanoo doo mina inaaqianna qangiroo narí ufireena fuaqasoofanoo firaa aqaanara foora ida auri maruna rafaurinoo innaarunaindari ooruku nammariki aqufinau.

9 Aqufufanoo ooruku nammari qaaramooki oosuseenoo qaaraqandaki kaqi marinoo moodaaki fidikaikamafinoo minakinaa noodaannaina kuqu taikafinoo sipauqa faqa qaara oosiranaki kaqi marinau, moodaa oosiranaki kuridifinau.

10-11 Kuridifufanoo misa ninaaqiana qangiroo moo fannoo narí ufireena fuaqanau. Fuaqa-soofanoo fasau firaafa mina auqu sukaqara fasau fee qiqau, mifa qoomara foora aurimaruna fuka nammariki maqasaa aqufufanoo qaaraqandaki quqaseenoo nammari amiqirafa, moodaaki faiqí anaasee mina namasoofanoo suka narufaqa moomoo kuqimariqau.

12 Qinee Yoohaneesa mina qafamasaafananoo inaaqianna qangiroo moo fannoo narí ukeena fuaqanau. Fuaqasoofanoo suani afu qaaramooki oosuseenoo moodaaki amannauna arinoo qaaraqandaki kaqi mariqau. Quqoona faqa fasau faqa moodaanaki amannauna arinoo qaaraqandaki kaqi qee marinau. Suani faasaanasaqari dinni ati qeemarinau, dinni ati sia qeemarinau eendaki quqoona faqa miqi kai inau.

13 Qinee mina qafamasaafananoo quqaumu sandaaqai qaqamaree fidanoo firaa kari faiqiara maqi ufa qufaqa iriqiafana. Mifa qinau mandoosana naaquqarafa kambiqaanoo qangiroo qaaramoo namu ufireena fuaqeefandinausa misa fuaqaifandinna kamuqoo maqasaaqaraasa firaa mandainaina naaquqaranaki marifaranoo fee qinau.



## 9

<sup>1-2</sup> Quqaumu miqi qimasoofanoo qangiroo moo fannoo narí ufireena fuaqanau. Fuaqasoofaqa qinee Yoohaneesa qafaafananoo fasau moo innaarunaindari maqasaa aqufufa findifufanoo moo fannoo maqa ameemaanai madika mina kooqi kiqa amufanoo mi fasaufa faiqiara foora findifinoo madika kooqi atuasooofanoo idamuna moomoo firaa idamunara foora minakiqari ururanau. Urureenoo innaaruna faqa suani afu faqa aiqama ititafinau.

<sup>3</sup> Mi idamunnanakiqari pandaqa moomoo qumureenoo maqasaa aqufiqau. Misa farukara foora naruaqera Anutufa quqanau.

<sup>4</sup> Pandaqa kaaqa andanda saqari amanee neemarusu marufanoo Anutufa minara qaoo qimaseenoo faiqí kai naruaqee qufaqa miqimiqau. Sia aiqama fasiqa anaasee naruaqee qinau. Anutuna akara niqinaaqa marinausa sia naruaqee qinau.

<sup>5</sup> Mi pandaqausara faiqí kuqa nariranara qaoo qinau, kaqi aupurarana kai moodaannai qisauku quqoonasaa aupurarana firaana nimaqee qinau. Mi pandaqausa narirafa faruka naruqoofanoora foora nidafi marinau.

<sup>6</sup> Moodaannai qisauku quqoonasaa pandaqa marinnakamuqoo faiqí anaasee kuqiranara randaida sia kuqifara aupuree marifanoo kuqirafa adeediramafinanoo doo miqoo taikasee fuannoo.

<sup>7</sup> Mi pandaqausa rakiranaki nimaru qoosausara foora mariqau. Misa nikiaqa koora

auqira qafeera foora marinau, misa noori faiqí noori fooqaasa mariqau.

8-9 Misa nikiaga asausi misisaua nikiagara foora kisaqandauqa marinau, misa nifai raioonara foora firaa nifai kisaaga marinau. Misa nimuqusa rafaqafirafa qainnara foora marinau, misa niqoosa ufa fannoo faiqí moomoosa sandaafanoo maqa ririqindee qimarinau.

10 Misa nimeesa ati fannoo farukara foora faiqí raquru nimimarinau. Doo minannai faiqí anaasee moodaannai qisauku quqoonasaa aupurarana nimifaranoo.

11 Misa saideenna uriqararafa maqa ameemaanai madika rakisirafa uriqararafa maridanoo. Yuda maqannaasa ufakiqari moo nuqu Heeburu ufakiqari mina auqu Abadoonnee qimariqau. Kirisa ufakiqari Apoorioonee qimariqau. Mi auquna oosana aiqama ainaina kuridi marinee qimariqau.

12 Doo miqinoo indaruqaa mandainaina taikanau. Qaaraqanda kaqi maridanoo.

13-14 Pandaaga taikafufanoo qangiroo moo fannoo nari ufireena fuaqanau. Fuaqasoofaqa qinee Yoohaneesa iriafananoo koora auqira qainda Anutuna afusaa marunakiqari ufa moo qufaqa iriqiafana. Mi ufafa koora auqira qainda aannai qaara faqa qaara faqa marunakiqari kambiqafinoo ufireena fuaqoo qangiroona qimaminoo qinuu. Eeufarateesa nammariqi qangiroo qaara faqa qaara faqa faiqí kuridi maria qangiroo namusa rumbaqa mariasa idukunnisaa.

15 Idukunnisoofaqa maqasaaqaraa fasiqa anaasee qaaramoosaa oosuseenoo qaaraqandaki kaqi quqasee moodaaki aiqama naru taikaqau dinni ati firaqoo kaqi quqanau. Anutufa ooqaindari misa deedaqamma nimufaqa mi aukuanna mi quqoona suaninasaa deedaqamma nimiqoosa nári rakira faiqiuqa faqa mi qangiroo namusa faiqí anaasee moomoo uqanna naru taikaqau.

16 Mi qangiroo namu marusa rakira faiqiuqa tu handareta mirioona marufaqa nindafaqiafana (200,000,000). Fifau saqari amaneera foora moomoo uqanna qafaqiafana.

17 Qinee Yoohaneesa qifu pisipasinoo marufaqa misa qoosauqa faqa misasaa mariasa faqa nindafaqiafana. Qoosasaa mariasa nimuqusa ititarafa akaqafa taatuqee idauruara foora mariqau akaqafa dirindaasi arirafa mariqau akaqafa tumana arirausa mariqau. Misa qoosauqa nikiqa raioona akiaqa miqirausa mariqau, misa nookiqari idauru namufaqa muna namufaqa nookiqari urimarinau.

18-19 Misa qoosauqa nooki faqa nimeesaki faqa faiqí narira afeeka maridanoo. Misa nookiqari idauru namufaqa idamuna namufaqa maa maqana afaaqasasa mariasakiqari faiqí anaasee moomoo uqanna narutaikanau. Mi qoosausa nimeesa sakaniara foora faiqí ukaqannimidanoo faiqí aupurarana firaana maraidaqa.

20 Mi narimaru ainainausa maqasaaqaraa fasiqa anaasee moomoo naru taikasoofoqa kaqi mariasa mina qafamasee sia rufleeqa sia

nári mandainaina minniseeqa Anutu finnai ubeekeeqa. Kaqi maqeeidaqa. Misa kaqi kai afaannauqara innaaru qimariqau. Misa koorannai siruaannai booroosannai ooninnai saqarinnai Anutunara foora sia faiqí qafeemaria ainainna sia ufa irimaria ainainna sia nimaria ainaina, nisaukukoo auqusaidaqa minara innaaru qimariqau.

<sup>21</sup> Mi kaqimaria fasiqa anaaseesa sia narí ari narí arirana minniseeqa, sia aukainaina minniseeqa, sia faiqí anaasee qumuarirana minniseeqa, sia ainaina qumuarirana minniseeqa kaqi kai maridanoo.

## 10

*Qangiroo moo papiqa kaqikaana rumbarana uqirafa quminau.*

<sup>1</sup> Miqimarufaqa qinee nindafaafananoo qangiroo moo amudaanai qimarufa innaarunaindari quminau. Mina qamunna sia qafaqifana qoonnamu qamunnara foora kai afisirafa marinau, mina akiqa oondanda figu inoo marinau, mina oori afiri suani afu miqirafa daroo daraa imarinau, mina aikuqara saqari aadana kikiqinoo marifaqa idaree mariandee imariqau.

<sup>2-3</sup> Mina asaukuki papiqa kaqikaana asaana ruanifeera airiqoofanoo marinau. Mi qangiroofa qumureenoo asauku uqannai aiku ooruku nammarisaa ramaseenoo asaaqai aiku maqasaa ramaseenoo raioonara foora firaaqoo faaqaqaru-fanoo innaarunai qirafa dinni qisauku taikasee

dinni ani qaara marasoofanoo innaarunai firaaqoo darara qimasee faiqiara maqi ufa moo qimaminau.

<sup>4</sup> Qinee Yoohaneesa innaarunai qira ufa irisee akara ruaneeriafananoo innaarunaindari qaoo qinoo qisauku dinni taikasee dinni ani qaaraqanda marasee innaarunai qira ufa sia akara rua, amiqimasee kukeeqaa qufaqa kukeeqaqiifana.

<sup>5-6</sup> Mi qangiroofa aiku ooruku nammariki faqa maqasaa faqa roofa asauku innaarunai uqeeraseenoo narí amana aqiqamaseenoo qinau. Anutufa naaru naaru marianafa innaaruna faqa maqa faqa ooruku nammari faqa quqoonafa minaki maru ainainausa auqunafa marianafa ani auqu ramasee maa ufana qidaqa. Sia moo kari faqa Anutufa nifeesida mariannoo.

<sup>7</sup> Inaqaiana qangiroo narí ufireena fuuqa-sainanoo Anutufa narí ooqai kukeeqaqai doo quqaannoo, ooqai narí tamummaqara fasiqauqa amiqira ufa qimannimuna doo miqoo taikkeenoo miqiannoo.

<sup>8-9</sup> Miqi qimasooofanoo innaarunaindaraa ufa faasai qimaqimufa kafaa qimaqiminau. Anee qangiroo innai aiku ooruku nammariki faqa maqasaa faqa ramaqai finnai papiqa airirana maqeeina maraa qufaqa qinee Yoohaneesa mifunnai oonuree mi papiqana qimianne qiafananoo qimaqiminoo qinau. Doo maraseenana namasainanoo aranandaki ooquree aseundammiannoo, ookinaa ookasaasa anoonara foora adiafaammiannoo.

<sup>10</sup> Miqi qimasoofaqa qinee mina asaukukinaa papiqa marasee namasaafananoo dooki ookasaasara foora adiafaainau, qiranandaki ooqureenoo aseundinau.

(Ookasaasa anoona naaru kambiqaaninna ainainara irirana adiafaa irafa maridanoo. Oosana oosana mandainaina aupurarana narirana kambiqaaninafa aseundirafa maridanoo.)

<sup>11</sup> Miqi masaafananoo qimaqiminoo qinau, anee Yoohaneefa anee kaifaa Anutuna ufa moomoosasaa quqaa moomoo faiqi anaasee faqa moomoo maqusanaasa faqa moomoo ufa qimariasa faqa karaambaiqauqa faqa amiqimasee Anutuna amiqira nifaaqooqa faqa manda nifaaqooqa faqa misa naaku nimaqainanoo misasaa kambiqaani.

## 11

### *Anutuna marirana qafamasee qu fasiqaqanda.*

<sup>1</sup> Miqi qimasoofanoo moo fannoo anireenoo nimanimaru kannapuna qiminoo qinau. Anee maana maree ooruree Yeerusareenni mari maqana Anutuna naaquqara amaana maqa faqa tatufira qainda faqa amanamasee qafamasee akara rua. Mi amaana maqanaki innaaru qimariasa Yisuna ufamau fimariasa minaindi marianara misa faqa nisaana rumasee akara rua.

<sup>2</sup> Amaana maqa naambeeqai sia amana-mandee akara rua mina aamina maqannaasaindi aanaamurundi maridanoo. Misa qaara fasiqa niku nisauku taikasee quqoona faqa qaara

quqoona faqa naaquqara maqusa Yeerusaree maqusa aniree nikunnai rafaqaqafuseefaranoo.

<sup>3</sup> Mi kamuqoo mi aukuanna qinee Anutusa qini ufa kooroo qimaria fasiqaqanda soofaara qamunna afisiraqanda niqqaanaqa qini ufa maqasaa mariasaki kooroo ifaranoo. Miqanda nuqu kooroo imariaqandee qinoo maridanoo.

<sup>4</sup> Miqanda aiqama maqa maaqasaa karaambaqa Yisuna oorisaqaara qooma miqiraqanda maridaqa.

<sup>5</sup> Faiqí akaqausa miqanda naruannee qimasaafanoo miqanda nookinaa ida fannoo naru taikaidanoo doo miqimasaifanoo miqanda naruanee qinausa kuqu taikeefaranoo.

<sup>6</sup> Anutufa mi kooroo ira fasiqaqanda afeeka niminaqa Anutuna ufa maqasaaqaraasa qimannimi marinna kamuqoo innaaruna ititasaifanoo aaku sia ruannoo. Mi kamuqoo Anutufa afeeka niminaqa aiqama nammari maa maqa maaqana afaaqasasa mari nammarisa nári nidiranannai nári iriseeqa arusaifanoo fidikaika kaimmiannoo. Mi afeekanannai nári kai irisee maqa aukarasaifanoo mandainaina oosana oosana kambiqeenoo faiqí anaasee nipatasaa narinoo aupurarana nimiannoo.

<sup>7-9</sup> Mi koorooira fasiqaqanda Anutuna ufa maqasaa fasiqa aiqama qimannimi taikasaifanoo maqa ameemaanai madikasaa rakisirafa kaasau aandau fannoo madikakiqari ururee doo miqanda faqa rakuannoo. Rakidanoo miqanda kuqa narusainaqa miqanda iri Yeerusaree maqusa qambaana akooqoo marifaranoo. Ooqai miqoo kai mi maqusanaki karaambaqa aunirira

saqarisaa pirimmannai ariqau. Mi maqusana auqu Yeerusaree marinau. Mandoosana maree maru maqusana kikiqammusidaqa Soodooma faqa Isipa faqee qidaqa. Mi kooroo ira fasiqaqanda iri Yeerusaree maqusa qambaana marifaqa aiqama firaa maqannaasa faqa kaqikaa maqannaasa faqa aiqama aanaamuru mariasa faqa aiqama ufa qimariasa faqa miqanda iri qaaramoo faasaana faqa moo faasaana atisaa faqa miqanda iri qafaifanoo nikundarara qaoo qimasaifanoo kaqi mariannoo.

<sup>10</sup> Aiqaama maqasaaqaraasa miqanda kuqirana irisee asasammasee qoomaqa suqasee namasee susu imarifanoo ainaina nari ami nari amidaga miqandara maaqi qifaranoo miqandara maasa maqasaaqaraasa aupurarana qimimari-aqanda doo kuqiqee qimasee asasifaranoo.

<sup>11</sup> Qaaramoo faasaana aiqaramafinanoo Anutufinnindari kasimari aidooqa qumureenoo miqanda iriki keeqafinaqa kasiqa findififaqa aiqamausa miqanda niqafeeinausa nindafeeqa kaaqa rufieefaranoo.

<sup>12</sup> Mi tamummaqara fasiqaqanda findi fifaqa innaarunaindaraa ufa moo fannoo maaqi qimasee miqanda qimannimiannoo inneeqara doo mai innaarunai uruaqa qifanoo asuru fannoo miqanda namuqaa aiqamausa nifusaa mara uqeereeqeenoo innaarunai quqaannoo.

<sup>13</sup> Miqanda muru quqasainanoo miqoo kai maqa firaaqoo uqanna kasinoo Yeerusaree maqusaki mari maqausa moomoo rambairinoo aqufuannoo. Faiqi sefeena tauseenna (7,000) moomoo uqanna minaki



kuqifaranoo. Moomoo uqanna nukudara foora faiqí anaasee kuqifaranoo, moomoo kaqi marifaranoo. Kaqi marinausa mina qafamaseeqa quandakiqa innaarunai mari Anutuna afeeka amooqifaranoo. (Qinee Yoohaneesa mi aiqama ainainna innaarunai maridaqa qafaafannana.)

<sup>14</sup> Doo indaaruuqaaqanda mandainaina doo aru taikeenoo, moodaa kai dauni aniraannoo.

*Ukeena fuaqammaree dinni taikasee dinni ani moodaa fuaqasee doo dinni ani qaaraikufa.*

<sup>15</sup> Qinee Yoohaneesa qifu pisipasamandoofaqa innaarunai maridaqa qafaafananoo qangiroo moo fannoo inaaqianaafa narí ukeena fuaqanau. Fuaqasoofanoo innaarunai mari ufafa maaqi qimasee firaa kari kooroo inau. Doo maqee maaqooqari maqasaa rakisira afeeka maasa karaambaiqa faqa narí asauku mundiranaindi faqa maridanoo mifa naaru naaru mina rakisida mariannoo.

<sup>16</sup> Mi ufana qima taikasoofanoo faiqí uriqararusa Anutuna ufa irira qaari fiqú fiqú iqa marusa noorindari maqasaa aqufufaqa Anutuna amooqiqa qiqaú.

<sup>17</sup> Oo Karaambaiqa Anutu aiqamausa uriqararafa firaa anee maridana ooqai marunafa maqee marianafa. Doo anee aneenna firaa afeeka kooroomasee maqasaaqaraasa rakisi nimaqee mariannanara maasa minara ani dufi dufi qimamaqaidaqa.

18 Aniara nikooqee mari maqannaasa aniara aanooqirafa qumbiqarausa mariafana ani Anutuna aanooqira aukwana nimirafa doo ani maridanoo. Kuqirausa findifu masee mandufa nimira aukwana doo ani maridanoo.

Ani ainainira fasiqa tamummaqarausa misa kadaapirirana akiaqara nimira aukwana doo animaridanoo.

Aiqama fasiqa anaasee uriqararausa faqa kaiqeesa faqa ani ufara rufiida naaquqaida mi mau fimarisa faqa misa kadaapirirana amiqira akiaqara nimira aukwana doo animaridanoo.

Maa maqa maqana mariasa kuridi mariasa misa kuridira aukwana doo animaridanoo.

19 Miqi qimasee uriqararausa Anutuna amooqimasoofaqa qinee quandaki qafaafananoo Anutuna amaana maqa innaarunai marufa kooqi atuafufaqa qafaqiafana. Mi amaana maqanaki Anutuna faqa faiqi faqa moodaanakikira ufa bookisara foora auquqoofaqa marufaqa qafaqiafana. Mi bookisanaki Anutuna ufa oonisaa akararirafa Mooseena ooqai amufa maru bookisana qafaqiafana. Qinee qafaafananoo aakuasaa uqinoo innaarunai qinoo maqa kasinoo firaa pupusamu aqufinau.

## 12

*Aareena fannoo anaasee faiqi nambiqarara qu ufafa.*

<sup>1</sup> Qinee Yoohaneesa miquna qafamaseeqa quandaki moo ainaina qafaqiafana. Innaarunai firaaqoo kooroo ira ainaina kikiqusirafa

kambiqoofaqa qafaqiafana, anaasee moo fannoo suani afu miqira kurusa afisusee maru qafaqiafana aikuqara quqoonasaa ranoo marufaqa qafaqiafana mina akiaqaki afisira qafeesaa qisaukuqara taikasee qiku ooqu qaaraqanda marasee fasaunamu mina qafeesaa qeemaru qafaqiafana.

<sup>2</sup> Mi anaaseefa amuaqu uqaikinoo marufa innaamunara aurinoo aupureenoo faaqa rinau.

<sup>3</sup> Faaqa rimarufaqa qinee quandafi moo ainaina innaarunai mari aininna kooroo ianinnana qafaqiafana. Qaareena qinaakuna qafaqiafana mina afaaqa aiqama taatuqee arinoo marinau mina akiaqa aambumanamu qisauku dinni taikasee dinni ani qaara marasee akiaqafaqaafa marinau. Aiqama akiaqasaa qafee afisinoo marinau, mina akiaqaqa aana qisaukuqara taikasee marinau.

<sup>4</sup> Mina ameesa fannoo innaarunaidaraa fasau moomoo nukudara foora rarisameeqeenoo maqai aqimarinau. Mi qaareenafa amuaqu uqaikira anaasee oorisaa kikinoo maridanoo faiqi maqasainanoo nambiqarara rakisidanoo.

<sup>5</sup> Mi anaaseefa akoonaiqi maqasoofanoo findifinoo qainna auqira samu qumareenoo aiqama aanaamurusaa rakisi nimaqaaninnana maqanau. Mi anaaseefa akoonaiqi maqasoofanoo Anutufa qaareena naandoo qimasee aranaiqi rafusueeqeenoo innaarunai nari ufa irira qaarisa qumasoofanoo marinau.

<sup>6</sup> Miqiufanoo mi anaaseefa quqasee qaareenara rufiasee sandee aadana maqa maaqaki Anutufa deedaqammaqoonaki oonu

marinau. Qaaramoo aukuana faqa moo aukuana atisaa faqa Anutufa miqoo rakisinau.

<sup>7</sup> Qinee Yoohaneesa qafeemariafananoo raki- rafa innaarunai kambiqaanau. Dinni qangi-roo karaambaiqa mina auqu Mikaraafa Anutuna qangi-roo namufaqa dinni qaareena nari manda qangi-roo namufaqa maridaqa innaarunai raki- mariqau.

<sup>8-9</sup> Mikaraafa Anutuna qangi-roo namufaqa afeekaikamasee qaareena rafaafuseenoo nari faqa nari qangi-roo namufaqa rafuseeqeenoo innaarunaindari maqasaa aqusanau. Anutufa aniara sia maaqooqari maaqoo mariannee qifaqa ani maqasaa rafusueeqee aqida fee qimasee aqusanau. Mi qinaakuna qaareenafa ooqai sakani marufa aiqama maa maqanasaaqaraasa ueeqee marufa marinau. Mina auquara Afaanna firaafa Sadannee qinau.

<sup>10</sup> Mikaraafa Sadanna maqasaa aqusoofaqa qinee Yoohaneesa qifu pisipasamasoofaqa innaarunai maridara fooqaana qafaafananoo ufa moo fira kari nameera qinau, Anutuna asumu maree mariafa doo animaridanoo. Doo maqee Anutufa nari Karaambaiqa afeeka kooroomaseenoo. Doo maqee mina asauku mundirafa nari aanoo doo uqannifiqeenoo. Doo maqee maasa qikaqaafasaauqa maqasaaqaraasa nikaruqirafa eendaki faqa faasaana faqa Anutuna afusaa munuqi miniqi marifa Sadannafa innaarunakiqari aranaiqi futeeqa rafusueeqeenoo maqasaa doo aquseenoo.

<sup>11</sup> Maasa qikaqaafasaauqa maqasaa fasiqauqa Anutuna sipsipa aanaaqi kuqu fidikanannai doo

Sadannana uraaqareenoo nári Anutuna anoona ufara kuqunannai faqa mina uraaqareenoo misa mi ufanara narí mariranara sia anoonee qimasee kaqi kuqiraree qimariasa maridaqa.

<sup>12</sup> Ufa firaqqoo kai qidanoo qináu. Innaarunaki mari ainainausa innee aiqama asasiaqa Sadannafa inniki marifa doo maqai aqufinoo. Innee maqasaa mariasa faqa ooruku nammariki mari ainainna faqa innee rufiida mariaqa. Afaanna firaafa inniki ooqu finoo mina aanoo firaafa mariannoo narí qusasaa marianinnanara iriseenoo mina aanoo firaafa mariannoo fee qinoo.

<sup>13-14</sup> Qinee Yoohaneesa mi ufana iriseeqa quandaki qaareena maqasaa qafeeqa. Qaareena qinaakufa doo maqasaa aqufinoo maridano qafeenoo aanoomaseenoo quandaki faiqi maqoo anaaseena arunaaneera afaqqanoo fufanoo Anutufa fira qaquumu aqoosa qaaraaqanda amufanoo qaqqamareenoo aadana maqasaa Anutufa deedaqqammaqoo maqqanasaa aqufinoo asumu marináu. Qaaramoo aukwana faqa moo atikai marasoofanoo Anutufa rakisimarufanoo qaareena fannoo mi anaaseena ariranasaa Anutufa ititeemarináu.

<sup>15-16</sup> Qaareena fannoo mi anaaseena qafamasee aanoo qufanoo mina ookiqari nammari moomoo aqfináu. Nammari aqfinoo mi anaaseena mi samuna aruanifeera fufanoo maqa fannoo mi anaaseena soodaqqinoo maqa oo raqqafufanoo nammari minaki kai keeqanáu.

<sup>17-18</sup> Qaareena fannoo mina qafoofanoo firaqqoo uqanna aranaqqoofanoo quandakinoo mi anaaseena ati aiku asauku marusa aiqama

Anutuna aauqira sandufamau fimariasa Yisuna kooroo ira anoona ufamau fimariasa faqa naru-  
anee qimasee fufa ooruku nammari afainni kik-  
iqinoo marinau.

## 13

*Maa maqanasaaqaraa kaasau aandaufara qu  
ufafa.*

<sup>1</sup> Qinee Yoohaneesa qifu pisipasamandoo in-  
naarunai maridaqara foora qaareena ooruku  
nammari afainni kikiqinoo marufaqa qafamasee  
akara rumaqaafananoo. Mifa miqoo kikiqinoo  
marufanoo ooruku nammariqari kaasau aan-  
dau moo fannoo ururoofaqa qafaqafana. Mi  
kaasau aandauna aanai qisaukuqara taikasee  
marinai mina akiaqa dinni qisauku taikasee  
dinni ani qaara marasee akiaqafaqaafa marinai.  
Aiqama aanaisaa karaambaiga qafee afisinoo  
marinoo aiqama akiaqamau narí Anutunara  
fidiqaaira manda nuquqa akararinoo marinai.

<sup>2</sup> Mi kaasau aandaufa firaa kusina fooqaatia  
faiqi narimarifa marinai. Mina aiku firaa  
samaada aikuara foora marinai. Mina oo  
aamara raioona oo aamara fooqaafa marinai.  
Mifa ooruku nammariqari ururoofanoo  
qafamaseenoo qaareena fannoo narí afaaqai  
maru ainainna mi kaasau aandauna ooruku  
nammarikinaana aminai. Narí rakisira  
qaari faqa aiqama maqannaasa rakisirana  
faqa mi kaasau aandauna amisoofanoo  
rakisinnimaqanau.

<sup>3</sup> Mi kaasau aandaufa marufanoo moo  
fannoo mina akiaqaki moo arufanoo kuqinoora

fooqaana maseenoo aru afaaqana ateeqaqoofa unufufanoo kaifaa findifinoo nammarikiqari ururoofaqa qafaqiafana. Aiqama maa maqana afaaqasasa mariasa mifa findifuna qafamasoofanoo naaquqoofaqa aiqama mina ufamau kaimbiqau.

<sup>4</sup> Qaareena fannoo firaa uriqarara afeekana kaasau aandau amunara minara aaqee maria fasiqa anaaseesa qaareenara innaaru qidaqa amooqi mariqau. Misa kaasau aandau oorinni faqa innaaru qimasee amooqiqa qiqa. Yafee maa kaasau andauna amana maridanee. Sia uqanna. Yafee mina ariraramasee aruannoo fee, sia moo fannoo amana arifara.

<sup>5</sup> Mi manda kaasau andaufa aiqamai rak- isidanoo mandufa uqanna oosana oosana ufa qi- marufanoo Anutufa sia qaoo qinau, qaara fasiqa niku nisauku taikasee moo fasiqa oonu qaara marasee quqoonasaa kaqi maridanoo mina kai qafee marinau.

<sup>6</sup> Mi kaasau andaufa Anutuna faqa mina auqu faqa manda niqurarara niquraree marinau.

<sup>7</sup> Mifa Anutuna aiku asauku faqa rakinoo rafaafinau. Mifa kaqikaa maqannaa faqa firaa maqannaa faqa aiqama ufa qimariasa faqa aiqama maqusanaasa faqa rakisimarufanoo Anutufa sia qaoo qinau kaqi kai qafanau.

<sup>8</sup> Aiqama maa maqa maaqana afaaqasasa mariasa mi kaasau andaunara Anutufara foora innaaru qimasee amooqifaranoo. Misa nári nuqu kaqi marifandinausa Yisuna bukaki akara ri- mariasa misa kai sia amooqifaranoo. Ooqai maa maqa maaqana sia maruqoo Anutuna sipsipa

aanaaqi kuquna bukaki nuqu marisa kai sia kaasau aandau amooqifaranoo.

<sup>9</sup> Aiqama naaqoo faqaasa ufa iriaqa.

<sup>10</sup> Kasooqagee kaasau aandau Yisuna ufasaara naruaninausara Anutufa ooqai irinau. Kaasau aandau fannoo rumbaaninausara faqa ooqai irinau. Mi narira aukuannai Anutuna ufa iri mariasa sia rufiasee minnisaaqa afeekaikamasee uaqee iaqa minasaa mundufi firana faqa kaqi kai fuaqa.

<sup>11</sup> Qinee Yoohaneesa mi kaasau andauna qafamaseeqa quandakufaqa moo kaasau aandau maqakiqari ururoona qafaqiafana. Mina aanai qaaraqanda sipsipa aanaira foora ururanoo marinau. Mina ufa fannoo qaareena ufa qimarinau.

<sup>12</sup> Sipsipa anaikirafa indaaruaqa kaasau aandau oorisa kikiqammambi mina afeeka firatia maranau. Mifa aqama maqa afaaqasasa mariasara indaaruaqa kaasau andaura amooqagee sia amooqifaqa narunauree qinau. Mi indaaruaqa kuqiraramasee afaqa atekarafa qunufunara innaaru qida amooqagee qinau.

<sup>13</sup> Sipsipa anaikirafa inaaqianna aandau fannoo aqamausa nifusaa faiqi sia auqaqaa ira ainaina auqinau, aqamausa nifusaa innaarunaindari ida fannoo maqasaa aqu fuannee qufanoo aqufinau.

<sup>14</sup> Mifa indaaruaqa kaasau aandau oorisa faiqi sia auqaqaa ira ainaina auqusoofanoo minannai maqasaaqaraasa aqama nikaruqinau. Miqidanoo mifa aqama maqasaaqaraasa qiman-



niminoo qinau, Innee afaaqa atekasoofanoo kuqiraramandee findifuna amana auquaqa.

<sup>15</sup> Misa auqusoofanoo sipsipa Anutufa uqeeqararee qimasee narí namuqaa qumee afeeka amufanoo aanaikira aandau fannoo unnaqimasee narí afeeka fee qimasee aidoo indaaruuqaa kaasau aandau amana auquqoonaki aidoo fuaqasoofanoo mina amana fannoo faiqiara foora ufa qinoo nariara sia innaaru qimasee amooqusa kuqa narinau.

<sup>16</sup> Sipsipa aanaikira aandau fannoo nariraru-faqa aiqama maqannaasa kaiqeesa faqa uriqararaura faqa ainaina faqaasa faqa kudifasiqa faqa rumbee mariasa faqa idukimariasa faqa aiqama narí akara nári nisauku uqannai fee niqinaaqafee akara rumannisanau.

<sup>17</sup> Mi akarana sia marinausa sia ainaina nimisee mina akiaqara feefauru mareefaranoo, ainaina faqa sia amana munnimma aqusee mareefara. Mi akarana oosana kaasau aandau mina auqu nabaqa mariannoo.

<sup>18</sup> Irirana faqaasa maa ufana iriaqa. Irirana faqaasa mi nabaqana kaasau aandau nabaqa oosana irifaranoo. Mi nabaqafa faiqí auqu kikiqammusidanoo. Mi nabaqafa maaqimminoo maridanoo. Sikisa handareeta faqa sikisti sikisa faqa maridanoo, (666).

## 14

*Maqasaaqaraasa moomoosa fuka idiroofaqa qafaafanna ufafa.*

<sup>1</sup> Qinee mi ainainausa qafamaseeqa quanda-  
uafa qafaafananoo sipsipa aanaaqi kuqufa Yis-  
ufa Oorifa aaqanasaa moo auqu Sioona aaqana  
minasaa kikiqinoo marinau. Oorifa aaqana  
Yeerusaree maqusa aaqa maridanoo. Mina saim-  
baqa faiqí moomoo mariqau. Yisuna auqu faqa  
mina akoona auqu faqa niqinaaqa akara rirausa  
kai mariqau. Mi fasiqausa nisaanaruafanaqa  
wan handareeta faqa footi maqi tauseenna faqa  
Yisuna faqa mariqau, (144,000). Faiqí ooni saqari  
uqanna auqufiqau.

<sup>2</sup> Qinee mina qafaidaqa innaarunaindaraa ufa  
moo iriqiafana. Firaa kari innaarunai qiara  
foora qinoo firaa oondaindari nammariara foora  
aqufidanoora foora qufaqa iriqiafana. Miqi-  
marunakina innaarunaindari piripunna ariu-  
faqa iriqiafana.

<sup>3</sup> Yisuna saimbaqa Oorifa aaqanasaa mar-  
iusa wan handareeta faqa footi maqi tauseenna  
faqa misa aiqama Anutuna qaari oorisa faqa  
qaara faqa qaara faqa aandau faqa uriqara-  
rausa faqa misauqa noorinni ubeekaqau. Noori  
ubeekaidaqa fuka idi moo raqau sia moo fannoo  
mi idina irifaranoo Yisuna faqa maru fasiqausa  
wan handareeta faqa footi maqi tauseenna faqa  
misa kai mi idina amana reefaranoo Yisuna  
fidikannoo feefaurirausa kai mi fasiqausa maru-  
faqa qafaqiafana.

<sup>4</sup> Mi fasiqausa sia anaasee qummuari marusa  
amiqira maanaaqara foora andeeqarausa kai  
maridaqa. Misa sipsipa aanaaqi kuquna Yisuna  
faqa aiqamai fimarusa misa maqasaa fasiqa  
nandafiana neera fooridaqa misa Anutunaindi

faqa Yisunaindi faqa maridaqa miqidaqa.

<sup>5</sup> Sia unna ufa misaki marusa sia aaqarafa misaki marusa.

*Qaaramoo qangiroo qu ufafa.*

<sup>6</sup> Qinee Yoohaneesa miqimaruna qafamasee quandafi qafaafananoo qangiroo moo fannoo innaarunai sandaaqai qaamaree fufaqa qafaqifana. Mifa amiqira fasaasa ufa naaru naaru marira ufa aiqama maa maqanasaaqaraasa firaa maqanaasa faqa kaqikaa maqannaasa faqa aiqama ufa qimariasa faqa aiqama maqannaasa faqa qimannimirara qaamaree finoo firaa kari qinau.

<sup>7</sup> Innee Anutunara rufiasee mina afeeka uriqararanara amooqiaqa, doo mifa maqasaa mariasa ufa irirafa doo ani maridanoo. Mifa innaaruna faqa maqa faqa ooruku nammari faqa kaqi nammariuqa faqa minauqa auqufa maridanoo, mina oorisa kumaramafi amooqiaqa.

<sup>8</sup> Mi qangiroofa miqi qimasoofofanoo qangiroo moo fannoo mina aanaaqianna qaamaree fidanoo Babiroonia maqusara anaasee kikiqa ususee qinau. Manda anaasee Babiroonia maqusa doo maqasaa aqufino maqusa naakundu kai saaeemaseenoo. Mi maqannaasa nári deedeepirana faiqí anaasee qummuarirana moomoo uainna nammariara foora aiqama maqannaasa nimufaqa namaseera foora aiqama maqannaasa nimufaqa namaseeqa furufarammidammia.

9-10 Doo mi qangiroofa miqi qimasoofanoo mina aanaaqianna moo qangiroo fannoo qaqa-maree finoo firaa kari nameera qimasee aiqamausa qimanniminoo qinau. Kaasau aandau fee nari amana auqiranaree amooqidaqa innaaru qimariasa mina akara niqinaaqa faqa nisaukusaa faqa akara rirausa misa Anutuna aanooqirana uainna nammariara foora nambigeefaranoo. Anutuna aanooqiranara qidanoo ididimari uainnana kikiqa usidanoo. Sia nam-mari namufaqa uainna namufaqa asooarana nimifaranoo kaqi uainna kai ididi marina kai nari manda oosana akiaqara aanooqirana idara foora qeemarina nimiannoo. Aiqama kaasau aandau amooqimariasa faqa mina akara maree mariasa faqa misa aiqama Anutuna naaquqara andeeqara qangiroouqa noorisaa faqa sipsipa aanaaqi oorisa faqa firaa idaqee marinaki aupuraranaki fifaranoo.

<sup>11</sup> Misa aupuraranana nimimari mi idauru munafa naaru naaru ururaidanoo mariannoo. Faasaana faqa eendaki faqa sia asooarana mareefaranoo kaqi miqi kai minoo mariannoo. Kaasau aandau fee mina amana auqiranara innaaruqimariasee mina akara maree mariasee misa aiqama miqi kai mifarannoo.

<sup>12</sup> Mi aukuannai maqasaa Anutuna aiku asaku marianausa mi aupuraranaki reendeenamafi fifimafi marirana faqa Yisunasaa kaqi kai mundufi marirana faqa miqimandee mi aukuanna Yisuna ufamau fimariasa miqiaqa.

<sup>13</sup> Mi qangiroofa miqi qimasooafa qini qifu pisipasamasooafa qinee innaarunaira foora

mariafananoo ufa moo qimaqiminau, Yoohanee anee maa ufana akara rua. Maa aukuanasaaqari karaambaiqaki keeqafiqa kuqifandin-  
ausa misa asasifaranoo. Anutuna maraquna fannoo mi ufana irisee dadaaqinoo qinau. Eeo kuqaa nariqa kadaapi firaana ririseeqa kuqiga adooaidaqa asasifaranoo. Nári kadaapirirana anoona kuqiranaki fiqa doo maree fidaqa asisifaranoo.

*Anutufa maa maqa maaqanakinaasa nifiqaseenoo nari ufa irimariasa maraaninna ufafa.*

<sup>14</sup> Qinee Yoohaneesa mi ufana iriseeqa quandafi qafaafananoo eekara asurusaa faiqí moo fannoo faiqí nimaakuara fooqaana ooqufaagee idanoo koora auqira qafee afisirafa asaukuki paipana afai raigarana asaukuki uaqeeufaqa qafaqafana.

<sup>15</sup> Mi fasiqafa asurusaa ooqumarifi marufanoo Anutuna innaarunai naaquqara amaana maqakiqari qangiroo moo fannoo raudee qumuree mi fasiqana firaa kari aaramaseenoo qinau. Doo narana qanaa marida aneenna paipanannai atekasee maree ania. Doo maqasaa naranara foora akuqanoo maridanoo.

<sup>16</sup> Asurusaa marufa mina iriseenoo eedoo qimaseenoo doo nari paipana rauqimareenoo maqasaa aquseenoo narana atekasee maree urinau.

<sup>17</sup> Maroofanoo qangiroo moo fannoo Anutuna naaquqara amaana maqaki innaarunai marunakiqari raudamaki anireenoo nari

asaukuki paipana afai raiqarana uqirafa raudoofaqa qafaqafana.

<sup>18</sup> Anutuna tatufira qaindasaa rakisimarufa qumureenoo paipana uqirafa qumuna aaramasee qimaminau. Anee doo uainna tati-maria sandafa maqasaaqaraasa mandoosana doo akuqanoo maridanoo, atekamaree murusee misa fidika saunara foora tati.

<sup>19</sup> Mina iriseenoo paipanafaqaafa narí paipana maqasaa uainna sanda ateeka mareenoo Anutuna aanooqirana tatimarunaki maqusai murusee naambeeqai aqinau.

<sup>20</sup> Aqusoofaqa misa tatisoofanoo fidika kai nammariara foora aafinoo faiqí ninuka kai ururufanoo nianai uqanna maree finau.

## 15

*Maa maqafa taikainna aukwana dinni ani qaara marasee qangiroo aupurarana maree anifara.*

<sup>1</sup> Qinee innaarunai mariafana moo innaarunai koorooira ainaina naaquqara ainaina kambiqoo qafaqafana maaqimasee kambiqanau. Qisauku dinni taikasee dinni ani qaara marasee qangiroo namu nári nisaukuki Anutuna taikaranaki aupurarana uqirausa aniqau. Mi aupurarana maqasaaqaraasa Anutuna ufa sia irimariasa nimisaifanoo Anutuna aranaqarafa taikaannoo.

<sup>2</sup> Qinee mina qafamasee quandaki ooruku nammariara foora tanuka minasaa maridanoora foora idauru namufaqa marufaqa qafaqafana. Miqoo ooruku nammari afaisaa faiqí anaasee moomoo Anutuna ufa irimarusa usimariqau.

Misa kaasau aandau akarara qaoo qimarusa misa kaasau aandau faqa mina amana auqirana faqa rakiara foora mina uriqararasa mariqau. Anutufa misa piripunna nimufaqa misa

<sup>3</sup> Anutuna ainainira faiqi Mooseena faqa sip-sipa aanaaqi kuqufa faqa miqanda idi ree mariqau. Maaqi qimasee idi raqau.

Oo Karaambaiqa aiqama afeekafaqaa Anutufa, Anee aiqamausa rakisi marianna oosanafa faqa anee imarianna oosana faqa idaaqirafa firaafa maridanoo.

Anee aiqama maqusanaasa Karaambaiqa mari-anafa,

Anee niniunafa andeeqarafa kuqaa marunafa marianafa.

<sup>4</sup> Oo Karaambaiqa yafasiqa fee sia aniara rufi-aidanoo.

Yafasiqa fee ani uriqararana sia koorooiannoo, Aneennaraa kai naaquqarafa mariananoo.

Ani andeeqara ainainirafa aiqamausa qafamasee minara aiqama maqannaa aniree ani oorisa aniree ani amooqifaranoo.

<sup>5</sup> Misa mi idina ramasoofaqa qinee Yooha-neesa qafaafananoo Anutuna amaana maqa innaarunai atuasooofaqa qafaafananoo minaki ooqai Mooseefa Anutuna uiqaana maqa us-akaqoofa mina aundurari marufaqa qinee qafaqi-afana.

<sup>6</sup> Dinni taikasee dinni ani qaara marasee qangiroouqa Anutufa faiqi anaasee nimianinna aupurarana uqirausa faasai nindafaafanausa misa Anutuna naaquqara amaana maqakiqari raudaqau. Misa qamunna anukarafa eekara

arirafa marinau. Misa koora auqira raitanda naamma ameemaanai rumberausa animariqau.

<sup>7</sup> Ani marufanoo Anutuna aaga aandau qaara faqa qaara faqa marunakiqari moo fannoo koora auqimaru qafeesa dinni taikasee dinni ani qaaraqanda marasee qafeesa naaru naaru marira Anutuna aanooqirafa qumbiqara qafeeuqa aiqama qangiroouqa nisaukuki moodaa moodaa quqasanau.

<sup>8</sup> Quqasoofanoo innaarunai amaana maqa idamuna qumbiqanau. Anutuna afeeka faqa Anutuna areenarana faqa minasaaqari idamuna fannoo mi amaana maqanaki qumbiqanau, sia keeqarana amana marinau. Nisauku dinni taikasee dinni ani qaara marasee qangiroo misa aupurarana taikasoo fanoo miqoo kai amana keeqaaqainau.

## 16

*Naaru kambiqaaninna ainainna kukeeqarana koorooirafa Yisufa Yoohaneena koorooqimamufanoo akara rinau.*

<sup>1</sup> Amaana maqakinaa idamuna qafamaseeqa iriqiafana ufa moo innaarunai maru amaana maqakiqari ufa moo firaa qoo nameera qimaseenoo aupurarana maroo qangiroosa qimaniminau. Doo innee qisauku dinni taikasee dinni ani qaara marasee qafee Anutuna aanooqira qafee maraasa doo innaarunaindari maqasaa muqu teeqiaqa.

<sup>2</sup> Miqi qufanoo indaaruuqaa qangiroo nari qafee mara maree innaarunaindari maqasaa



muqu teeqinau. Teeqimasoofaqa maqasaa fasiqí anaasee kaasau aandaure innaaru qimarusa mina akara maree marusa misa nifaaqasasa kaaqa nidafidanoo afundidanoo eefeeda namuana fooqaafa moomoo narinau.

<sup>3</sup> Narusoofanoo kafaa mina aanaaqianna qangiroo moo fannoo narí qafee mareenoo muqu ooruku nammariki teeqimaqusoofanoo kuqira fasiqa fidikara foora kai mandifufanoo kuqira fasiqa fidikara foora maqufufanoo ooruku nammariki marida kasi maria ainainafa aiqama kuqu taikafinau.

<sup>4</sup> Kuqutaikafufanoo miqanda ninaaqiana moo qangiroo fannoo narí qafee mareenoo innaarunaindari nammari uqannaki muqu teeqimasoofanoo fidika kai qumbiqafinau.

<sup>5</sup> Qumbiqafufanoo nammarisaa rakisimaru qangiroo fannoo nameera qinau. Oo Anutufa naaquqarafa anukarafa ooqai marunafa maqee marianafa anee fidika naaqee qimasee nimiananara andeeqarafa mariananoo.

<sup>6</sup> Misa maqasaa fasiqa Anutuna ufa irimaria fasiqanaaseesa faqa tamummaqara fasiqauqa faqa fidika ruqiee marianara anee fidika nimianaqa naidaqa. Nári oosanara saanara mina akiaqara fidika naidaqamiafoo qinau.

<sup>7</sup> Miqimandoofanoo Anutuna tatufira qaindasaqari ufa moo qinau. Oo Karaambaiqa Anutufa uriqararafa aninna narirafa kuqaa andeeqarafa kai marifa mariananoo.

<sup>8</sup> Mi namusa miqimasoofanoo inaaqianna moo qangiroo fannoo suanisaa narí qafeekinaana muqu teeqimasoofanoo suani fannoo firaqoo

ididinoo faiqí anaasee firaqoo idara foora nitakuqinau.

<sup>9</sup> Nitakuqufaqa aanoomasee quandaki Anutuna auqu ramasee aquraraqau. Mi oosana oosana aupuraranna marasee mi oosannana akoonaa aqurarasee sia nári mandainaina minisee Anutuna amooqiqau. Kaqi maraqa fimariqau.

<sup>10-11</sup> Mi namusa miqi masoofanoo qangiroo moo fannoo narí qafeekinaana kaasau aandau qaarisaa teeqimasanaau. Teeqimandoofanoo asukuna fannoo kaasau aandau ququsakinaasa ititannimaqasoofaqa nipatara aupuraidaqa naridaqa nidafirana faqa namuanara faqa aupuraidaqa nifai riqidaqa innaarunai Anutuna aqurara ufa kai qidaqa kaqi furufarammasee nári mandainaina kaqi mara maree fimariqau.

<sup>12</sup> Mi namusa miqimasoofanoo qangiroo moo fannoo narí qafeekinaana Eeufarateesa nammariki teeqimaqusoofanoo mi nammarifa aiqama aadanusinau. Suani oosanaindaraa karaambaiaqauqa nári rakira fasiqauqa faqa rakiraramasee aniaqeera aadanusinau.

<sup>13</sup> Qinee Yoohaneesa mina qafaafananoo afaanna qaaramoo taka fooqaana mandaikirana qafaqiafana. Moo fannoo ooqai maru qaareena ookiqari ururanau moo fannoo indaarugaa kaasau andauna ookiqari ururanau, moo fannoo unna qira tamummaqara fasiqa ookiqari ururanau.

<sup>14</sup> Mi qaaramoo takausa oosana oosana ainaina sia faiqí auqaaqaa ira ainaina auqeemaru afaannausa faiqí rakisirausaikiqa mariqau.

Mi qaaramoo afaanna namusa aiqama maqa maaqakina karaambaiqauqa nári sundia namufaqa niffeegee rakiranaki quqee mariasa mariqau. Misa Anutuna faqa rakirara masaifanoo Anutufa uriqararafa misa aiqama naru taikaannoo.

<sup>15</sup> Miqimarufanoo Yisufa miqoo qini qimaqiminoo qinau. Qini ufa iria, qinee ummuarira fasiqara foora ireeda kai innaarunaindari qumuanaura. Nifu magee marusa faqa qamunna deedaqiraua faqa asasifaranoo, sia kaqisamu fiqa faiqí nifusaa faqa Anutuna afusaa faqa sia nisaurifaranoo.

<sup>16</sup> Yisufa miqi qimaqimisoofanoo mi taka namusa aiqama karaambaiqa faqa nári sundia namufaqa niffeegeenoo Isaraee maqasaa quqasanau. Mi maqa maaqana auqu Heeburu ufakiqari moo auqu Isaraee maqannaasa ufakiqari Aramakeedoona maqa maaqee qimariqau.

<sup>17-18</sup> Miqoo suqu quqasoofanoo inaaqianna qangiroo fannoo narí qafeekinaana ufaisaa muqu teeqinau. Teeqimasoofanoo Anutuna qaarisaaqari amaana maqaki marufa ufa moo firaa kari qinau. Doo taikееfoо qimasoofanoo aakuasaa uqinoo innaarunai qinoo oosana oosana ufa qinoo maqa naaquqarafa firaafa uqanna kasinau. Ooqai oosana arooqooqari sia maqa maaqimasee kasidanoo maana firaafa uqanna uriqararafa kasiannoo.

<sup>19</sup> Yeerusaree maqusa qaaramoo kamu afoomakinoo aiqama maqusanaasa taunna faqa kuridiannoo. Mikari Anutufa Babiroonia maqusara sia auninau. Narí kaafakinaa aanoo

qirana idaḡee mari nammariara foora adiasee Babiroonia maḡannaasa nimisoofaḡa namasee kuḡiḡau.

<sup>20</sup> Aiḡama ooruku nammariki mari afumausa aiḡama nammariki ukuḡnama taikanau, aiḡama aaḡana faḡa taikanau.

<sup>21</sup> Pupusamu innaarunaindari faiḡisaa aḡufinau firaa pupusamu moodaa moodaa fifti kiroogaram qaara fasiḡa niku nisauku taikasee moo fasiḡa asaukuḡara taikasee sikeera akara kamu aḡufufaḡa faiḡí anaasee mi firaa pupusamuna ḡafamasee ḡuandaki Anutuna aḡurara ufa kai amiḡau.

## 17

*Firaaḡoo ummuari maria anaaseesa ninoona aru ufafa.*

<sup>1</sup> Pupusamu taikafufanoo ḡafee teeḡiusak-iḡari moo ḡangiroo fannoo ḡini daareenoo ḡinau, Yoohanee anee mai anirainaḡa firaaḡoo ummuari mari anaaseena kuridirana oosana uḡafiḡaa. Mi anaaseefa firaa taunna kikiḡa usidanoo, moomoo nammari mina aaḡa maridanoo. Mi moomoo nammarina kikiḡa usirafa maridanoo faiḡí anaasee moomoo maḡusanaasara ḡidanoo.

<sup>2</sup> Maa maḡanasaḡaraa karaambaḡiḡauḡa mi manda anaaseena aafeeḡee mariafa maridanoo aiḡama maḡanna faḡa anaasee faḡa maa anaaseena ummuarirana uainna nammariara foora neeneesaidaḡa furufaridaḡa.

<sup>3</sup> Miqi qimasee qimaqimisoofofanoo Anutuna maraḡuna fannoo daakufufanoo mi qangiroofa qini mareeqeenoo innaarunaindari maḡasaa muqu aadana maḡasaa quḡaseenoo mi anaaseena uḡaqifiḡanau. Mi anaaseefa taatuḡee aandau kaasau aandau ataufakaaḡa ooḡu faaḡee marinau. Mi kaasau andauna afaaḡasasa Anutunara fidiḡaa ira auḡu moomoo mina afaaḡasasa akararinoo marinau. Mi andaufa dinni qisauku taikasee dinni ani ḡaara marasee akiḡa faḡaafa marinau, mina aanai qisaukuḡara taikasee marinau.

<sup>4</sup> Mi anaaseena ḡamunna sia kaiḡeesa afisimariana uriḡararausa afisimaru ḡamunnanda saasaakoona arirana faḡa taatuḡee arirana faḡa afisimarufa aiḡama ainaina koorannai auḡirana kai afaaḡa auḡirafa marinau. Firaa feefauru aḡimari ooninna pupu ooni fooḡaana faḡa maranoo ninau. Mi anaaseena asaukuki kooraa auḡira kaafa uḡusee marinau. Mi kaafanaki ikairifaḡaa ainaina faḡa faiḡi anaasee narí ummuari narí ummuarirana aiḡama mi ainainafa mi anaaseenasaa aniqusirafa mi kaafanaki ḡumbiḡanoo maridanoo. (Faiḡi anaasee kikiḡa usidanoo kuḡaa ḡira Anutuna minniseeḡa unna ḡira Anutuna amooḡimarianara ḡidanoo.)

<sup>5</sup> Mi anaaseena aḡinisaa mina auḡu akara ri-noo maridanoo auḡu akooḡoo maridanoo oosana kukeeḡanoo maridanoo. Mina auḡu maaḡi ḡinoo maridanoo Firaa Babiroonia aiḡamausa nári naumoosaa feefauru maree mariasa ninoofa faḡa kaaḡa aanaaseera rimariasa ninoofa faḡa

maridanoo.

<sup>6</sup> Qinee Yoohaneesa mina akara qafeeqa mi anaaseena oosana qafaunanoo furufaramminoo marifaqa qafeeqa. Mifa Anutuna maqasaaqaraa faiqí anaasee fidika faqa Yisuna ufara afeekaiki mariasa fidika faqa uainna nammariara foora misa narusee misa fidika neeneeseenoora foora furufarinoo nimari anaaseefa. Qinee mina qafamasaunanoo firaqoo daaquqeenoo. Qan-giroo fannoo miqiafananoo qiqafeenoo qinau.

<sup>7</sup> Anee nanaree aaquqaidanoo fee qinee mi anaaseena faqa mi aandauna faqa oosana kooroo qianamma iria.

<sup>8</sup> Anee kaasau aandau qafaanafa ooqai marufa maqee sia maridanoo, mifa qusasaa maqa ameemaanai madikakiqari urureenoo taikaranaki fuannoo. Naaru naaru mariranaki fimariasa Anutuna bukaki nuqu akara rinoo maridanoo, ooqai maa maqafa sia maru kamuqoo mi bukanaki misa nuqu akara rumaqoofa maridanoo. Maa maqanasaa mariasa sia mi bukanaki nuqu akara rumaqoosa misa mi manda kaasau aandauna qafeeqa kaaqa naaquqainaqa mina ufamau fifaranoo. Ooqai marinoo maqee sia maridanoo kafaa kasoqaqee kooroo ianinnanara tautumasee mina ufamau fifaranoo.

<sup>9</sup> Maa ufana irirana faqaasa kai irifaranoo. Mi kaasau taatuqee aandauna akiaqa dinni qisauku taikasee dinni ani qaara marasee akiaqafaqaafa maridanoo. Mi akiaqa namuna faqa dinni qisauku taikasee dinni ani qaara marasee aaqana namu kikiqa usinoo maridanoo mi anaaseefa

minauqasaa ooqufaaqee maridanoo, karaambaiqauqaindi faqa miqimasee namu maridaqa.

<sup>10</sup> Moodaannai qisauku karaambaiqa doo taikafiqau, moodaa kaqi rakisidanoo maridanoo moo fannoo aniraannoo anirainanoo qusasaa taikaannoo.

<sup>11</sup> Mi kaasau aandaufa anaasee minasaa ooqumariufa ooqai marufa maqee sia maridanoo kasooqaqee kafaa kambiqaanoo. Ooqai indaaru mifa dinni taikasee dinni ani qaaramarasee karaambaiqa marunaki mariufa taikafufanoo kaifaa kambiqafinoo dinni ani qaaramoo kinanoo mifa qusasaa kuridiranaki fuannoo.

<sup>12</sup> Manda kaasau aandau aanai qisaukuqara taikarafa miqimandee kai kasooqaqee karaambaiqauqa maqasaa moodaa kari kambiqafi maridaqa faiqi anaasee rakisi nimaqeeffaranoo. Mi namusa nari afeeka manda kaasau aandau naida amisaifanoo mifa misa faqa qusasaa faiqi anaasee rakisi nimaqaannoo.

<sup>13</sup> Mi karaambaiqausa qisaukuqara taikarausa moodaa irirana mariranasaa maridaqa nari afeeka faqa nari uriqararana faqa mi manda kaasau aandauna pooduaqida amimarifaranoo.

<sup>14</sup> Mi karaambaiqausa sipsipa aanaaqi Yisuna aruannee qimasee mina faqa rakifara. Yisufa nari rusandeesamumasee naaramaqaisa afeekaikamandee Yisuna faqa fimariasa misa saimbaqa mi karaambaiqausa naru taikeffaranoo. Mifa Yisufa aiqama karaambaiqa maridanoo aiqama uriqararausa urinaaqararafa maridanoo minara Yisufa quandaki misa faqa naru taikaannoo.

<sup>15</sup> Mi qangiroofa kafa mi anaaseenara qi-maqimino qinau. Mi anaaseefa namhari amuaqusa oqumaruna anee qafaanano. Mi nammarifa moomoosa maqusa mariasa moomoo fasiqa anaasee ufa oosana oosana qimariasa kikiqamusino mi nammarinasaa maridanoo.

<sup>16</sup> Mi qisaukuqarana taikasee aanai nimanasaa karaambaiqauqa mariasa faqa manda kaasau aandau faqa mi umuari mari anaaseenara fidiqaammidaqa mina aiqama ainaina marasaifanoo mifa kaqi samu mariannoo. Misa miqoo mina amaqi namasaifanoo doo idaqama taikafuannoo.

<sup>17</sup> Mi karaambaiqausa sia nariqa kai miqifaranoo. Anutufa qumee fuki faaki qinaqa misa sia irirainni misa nari iriranammifoo qimasee nari afeeka manda kaasau aandau amifaranoo. Anutufa nari ufa anonaikianinna aukuanara afeesidanoo miqiannoo.

<sup>18</sup> Mi anaaseena anee qafaanafa mifa aiqama maaqa maaqa karaambaiqausa rakisi nimaqemari maqusafa maridanoo.

## 18

### *Babiroonia maqusa Anutufa naru taikoo ufafa.*

<sup>1</sup> Qinee Yoohaneesa mi ainainausa qafamasee moo qangiroo qafaqiafana. Anutufa nari afeeka firaana amufanoo innaarunaindari maqasaa qumuroofanoo mina areenarafa firaqoo aiqama maqa maqasaa areeneenoo kaaqa qamaqinau.

<sup>2</sup> Mifa firaa kari maaqi qimasee nameera qinau. Mifa doo kuridinoo firaa Babiroonia maqusa doo



aqufinoo kuridinoo. Mi nakundunaki afaanauqa faqa nimanauqaindi qikairi faqaasauqa faqa ufiniuqa afaanna ufini kai fidiaga irafauqa kai maridanoo.

<sup>3</sup> Mi maqusaanaasa nári ummuarirana faiqí anaasee narí deedeepa narí deedeepirana uainna nammariara foora aanaamuru mariasa niminoo innee naaqee qimasoofaqa neeneeusa maridaqa. Maqasaaqaraasa aanaamuru karaambaiqauqa Babiroonia faqa ummuaridaqa naafeeqeusa maridaqa. Aiqama maaqa maaqa pisinisa uqeeree mariasa Babiroonia maqannaasa kaqa ainaina moomoo irairaimarinanoo minannai munnimma moomoo maree mariasa maridaqa.

<sup>4</sup> Mi qanqiroofa miqi qimasoofanoo innaarunaindaraa ufa qinee Yoohaneesa moo iriqaifana. Mifa maaqi qimasee Anutuna ufa irimariasa qimanniminoo qinau.

Oo qini qiku qisauku innee mi maqusanakiqari doo aniaqa. Innee sia misa mandoosanaki keeqaaqa miqiga sia misa nariranaki faqa keeqaaqa.

<sup>5</sup> Mi maqusaanaasa mandainaina fannoo naramuaqa naramuaqa inoo oorufiifanoo meerai innaarunai ooru maridanoo. Anutufa misa mandoosana qafaidanoo iridanoo.

<sup>6</sup> Misa inni mandaikamma nimaqoondée kai innee quandaki nári nimiaqa. Misa inni mandaikamannimaqoona akiaqara innee quandaki qaaraikamandee nimiaqa. Misa manda nammari inni nimunara innee quandaki mi kaafanaki kai idaqainna nammarina firaaqoo nimifaqa naaqa.

7 Babiroonia maqannaasa nári nifaaqa areenarana faqa nári moomoo amiqira ainaina faqa nariqa maraqau. Mi ainainna amana kai innee aupurarana faqa ikifaafau qirana faqa misa nimiaqa. Misa náriara uriqararausee qimariana sia maasa keekoopau maridau. Maasa sia ikifaafau qianauree qimariana akiaqara aupurarana faqa ikifaafau qirana faqa nimiaqa.

8 Misa miqi qimaria mandainaina akiaqara misa firaqoo nidafirana faqa namuana faqa aurirana faqa ikifaafau qirana faqa aandaroo narirana faqa aiqama ainaina moodaa kari misa nifaaqa quqasaaqa. Misa mi maqusafa ida qama taikaannoo. Karaambaiqa Anutufa misa ufa iri-marifa afeeka uriqararafa marifa maridanoo.

9 Mi qangiroofa Babiroonia maqusara kaqi qinoo qinau. Maa maqa maqanasaaqaraa karaambaiqauqa Babiroonia maqusaindaraa mandainaina maree mariasa mi maqusana idaqainna idamuna qafamasee firaqoo ikiraqeefaranoo.

10 Misa mi maqusana aupurarana qafamasee rufiasee nianai tatiqa maridaqa maaqi qimasee faiqira foora mi maqa maaqana qimamifaranoo. Oo mandainaina, Oo naaquqara ainaina maa fira afeeka maqusa Babiroonia moodaa faasaana kai ani mandoosana akiaqara kuridi taikaananoo.

11 Maqasaa pisinisa fasiqauqa faqa mi maqusana ikiraqaida maaqi qifaranoo, sia mi maqannaasa kafa maasa amiqira ainaina marasee feefauru qimifaranoo.

12 Sia kafaa moo fannoo maasa koora faqa siruaa faqa firaa feefauru aqimaria oosana oosana ooniuga faqa marasee feefauru qimifaranoo. Sia kafaa moo fannoo maasa amiqira qamunna oosana oosana saasaakoonna arirana faqa fidika arirana faqa marasee feefauru qimifaranoo. Sia moo fannoo maasa amiqira saqari faqa eereefanta aanainnai auqimaria ainainna faqa firaa feefauru aqimaria saqarinannai auqimaria ainainna faqa booroosannai faqa qainnannai faqa amiqira ooninnai faqa auqimaria ainainna sia kafaa marasee feefauru qimifaranoo.

13 Sia moo fannoo ooruku oosana oosana faqa amiqimasee afundimaru ainainna faqa makaqa nammari faqa fadameena faqa parauaqa faqa raisa faqa burimakau faqa sipsipa faqa qoosa faqa qoosa rarisee mari karana faqa karabusa ainainira faiqi faqa faiqi nimana faqa sia moo fannoo kaifaa mi ainainausa marasee munnimma qimifaranoo.

14 Pisinisa imaria fasiqausa Babiroonia maqusara maaqi qimasee qifaranoo. Babiroonia maqannaasa innee niqaararee marifaqa adiafaa imarifaqa maree maria ainainausa doo kukeegafinoo, ani munnimma moomoo faqa ani adiafaairafa kaaqa qaranasaa marina doo taikenoosia kafaa paqurinnaranoo.

15 Pisinisaiki maria fasiqausa Babiroonia maqannaasa amiqira ainaina feefaurumasee minannai firaa munnimma maree marusa mi maqusana aupurarana qafamasee rufiasee nianai tatiaga marida ikiraqeesee soofaaramaseeqa maaqi qifaranoo.

16 Oo maa firaa maqusa mandainaina naaquqarafa kambiqanoo maridanoo. Mi maqusafa aanaaseera foora saasaakoona arirana faqa fidika arirana faqa afisirafa koora auqimaria oondana faqa firaa feefauru aqimaria ooniuga faqa afaaqa auqirafa doo maqee dadi taikafinoo.

17-18 Miqi qimaseenoo mi qangiroofa sipa kiateenara maaqi qinau. Aiqama sipa kiateenauqa faqa nári pooskurauqa faqa nári pasindiauqa faqa aiqama ooruku nammari amuaqumau nidaqa ainaini marusa Babiroonia idamuna qafeeqa nianai tatieeqa ikiraqeeqa maaqi qifaranoo. Sia moo maqusa maa firaa maqusa auqu faqaafa miqirafa maridanoo.

19 Miqi qimaseeqa kookooma afaqa qumaree nikiaga amoondunna kukupamaseeqa maaqi qifaranoo. Oo mandainaina naaquqarafa firaa maqusa auqu faqaafa kukeeqeenoo. Aiqama sipaki nusa ooruku nammari amuaqumau nusa maa maqusanakinaasa ainaina moomoo nimsaida firaa munnimma maree marunausa doo dauni mi aiqama ainainafa qama taikeenoo.

20 Mi qangiroofa miqi qimaseenoo quandakufanoo Anutuna aiku asauku Babiroonia maqusara qimannimino. Innee innaarunai mariasa faqa Anutuna aiku asauku faqa Yisufa niqiqoo fasiqausa faqa Anutuna tamummaqara fasiqauqa faqa innee aiqama asasiaga. Mi maqusafa inni nári ifa mina akiaqara Anutufa maqee mi maqusana arifanoo kuridinoo asasiaga.

21 Miqi qimasoofanoo qangiroo moo amudaanai qimarufa ooni firatia minannai mi aukuanna maru fasiqanaaseesa sakuma andaana andaana rimariqau. Mi ooninna fooqaa tia rafusu qumareenoo ooruku namariki aranaiqi aqinoo qinau. Mi firaa maqusana auqu faqaana Babiroonia maqusa ooni aqunnana amana kai aqusainanoo kukeeqafinaqa sia kaifaa qafeefaranoo.

22 Minaki piripunna arimariasa faqa kaqikaa ufireena fuagee mariasa faqa firaa ufireena kookaauru fuagee mariasa faqa aiqama musika fuagee mariasa faqa sia kaifaa mi maqusanaki qafeefaranoo. Oosana oosana ainaini mariasa misa kukusi mariafa sia kafaa irifaranoo, qaindi afai faqa siammirifaranoo.

23 Sia minaki qooma qaannoo sia kafaa nimundarana tutuqirafa mariannoo. Babiroonia maqusai pisinisa imarusa faqa aiqama maqanna pisinisa imarusa faqa urinaaqarararusa mariqau. Inni aukainaina maraqa nuasa nariqa unnaqira aukainainannai aiqama maqannaasa nikaruqidaqa.

24 Anutufa nari aiku asauku fidika faqa nari tamummaqara fasiqauqa fidika faqa aiqama maqasaa kuqimarusa faqa Babiroonia maqusaki paqurunara narirana nimiannoo.

## 19

1 Mi qangiroofa Babiroonia maqusara ufa qimasoofaqa quandafi ufa firana innaarunai qifu pisipasamasoonaki maridaqa iriqlafana. Mi ufafa faiqi moomoo suqiqa maridara foora qinoo

maaqi qiqau. Anutuna amooqiaqa. Faiqí asumu maree mariana faqa kaaqa qarana faqa firaa afeeka faqa maasa Anutunaindi maridanoo.

<sup>2</sup> Mifa mi umuari mari anaaseefa maqasaaqaraasa putaamannimaqee marunna akiaqara Anutufa mina arinau. Miqunara mina ufa nimirafa kuqaa andeeqarafa maridanoo. Mi anaaseefa Anutuna ainainira fasiqauqa kuqa narunara Anutufa arinau.

<sup>3</sup> Misa kafaa faaqariqa qiqau. Anutuna amooqiaqa. Mi maqusana, Babiroonia maqusa idamuna fannoo naaru naaru ooru fimariannoo.

<sup>4</sup> Miqi qimasoofaqa faiqí firaasa moodaa fasiqa faqa qaara faqa qaara faqa Anutuna qaari fiqum fiqum iqa marusa faqa aandaum qaara faqa qaara faqa marusa faqa Anutuna oorisa noorindari maqasaa aqufidaqa Anutuna amooqidaqa qiqau, misa kuqaa qidaqia, Anutuna amooqiaqa.

*Sipsipa aanaaqi Yisuna amundara qoomaqa ufa.*

<sup>5</sup> Miqi qimasoofanoo ufa moo Anutuna qaarisaaqari qufaqa iriqiafana. Aiqama Anutuna ainainimarusa minara rufieemarusa, kaqiqeesa faqa uriqararusa faqa aiqama maasa Anutunara amooqiaqa.

<sup>6</sup> Miqi qimasoofanoo ufa moo faiqí moomoosa suqidara foora firaa oondainni nammari aqufidanoora foora innaarunai qinoora foora miqira ufa fannoo maaqi qinau. Innee aiqamausa Anutuna amooqiaqa. Karaambaiqa maasa uriqarara Anutufa afeeka uqanna mifa narí aiqamai rakisinnimaqarana doo oosana araseenoo uriqaranoo maridanoo.

7-8 Taturirana aruaninna sipsipa anaaqifa Yisuna amundarafara foora doo animaridanoo, minara maasa susuiqa asasiaqa mina uriqararana amooqiaqa. Mina aanaaqara foora Anutufa fuka siara eekara arimaruna aminoo maa siarana iraanee qufanoo irasee deedaqinoo maridanoo. Mi eekara siarafa Anutuna maqasaa fasiqa anaasee andeeqara oosana kikiqamusinoo maridanoo.

<sup>9</sup> Mi ufana qimasoofanoo mi qangiroofa qini Yoohaneesa qimaqiminoo qinau. Yoohanee maa ufana akara rua. Maa ufausa Anutuna kuqaa anoona ufa maridanoo. Anutufa sipsipa aanaaqi amundara qoomaqara naaree marisa susuida asasimariasa maridaqa.

<sup>10</sup> Miqi qimasoofaqa qini daaquqoofaqa mi qangiroona aikuki doorindari aqufumafi amooqianeeriafananoo mifa qaoo qimaseenoo qinau. Oo anee sia miqia. Aiqaama Yisufa kooroo ira anoona ufa qumaree mariasa ani faqa ani akaqaafasauqa faqa moodaa ainainimarunausa maridaqara anee sia qini qimooqia Anutuna kai amooqia. Yisufa nari maru aukwana nari anoona ufa kooroinau. Mi ufafa kai Yisufa sia kambiqoo aukwana tamummaqara fasiqauqa naakufufaqa qimannimufaqa akara riqau.

*Eekara qoosaa marufa nari andeeqaranan-nai aiqamausa uriqararafaikinau.*

<sup>11</sup> Mi qangiroofa miqi qimasoofaqa innaarunai marida qafaafananoo innaaruna rakeemambufaqa akooqoo mariqau. Qinee minaki qoosa moo eekara arirana qafaqiafana. Mina ataufakaaqa

Yisufa ooqufaagee maridanoo mina auqu qaara auqu faqaafa. Moo auqu amiqirafa mapukusee miqoo kai mari fasiqanee qinau. Moo auqu kuqaa ufa qimari fasiqanee qiqau. Narí andeeqara iriranannai kai faiqí anaasee ufa rainanni-maqaidanoo minannai kai mandoosana maree mariasa rakirana marannimidanoo.

<sup>12</sup> Mina afu idauru miqirafa qeemarinau. Mina akiaqasaa karaambaiqa qafee moomoo afisinoo marinau. Mi fasiqana auqu narí afaaqai akara rinoo maridanoo sia moo fannoo qafaidanoo narí kai qafaidanoo.

<sup>13</sup> Mina qamunna afisimarufa fidika aanaaqi marinau. Misa mina auquara Anutuna ufafee qimariqau.

<sup>14</sup> Mifa narí qoosasaa aiqarofanoo mina aanaaqianna Anutuna innaarunaindaraa rakira ammiuqa aiqama nári eekara qoosasaa nariqa qamunna eekara qamunna anukara qamunna afisirausa mina aanaaqianna mina afaqee fiqau.

<sup>15</sup> Mina ookiqari aseema raiqarafa ani marinau. Minannai aiqama maqannaa rafaagafuannoo, qainna samu uqirafa nidanoo rakisinnimaqaannoo. Mifa uriqarara afeeka Anutuna aanooqirafa aranandaki idara foora aiqama maa maqanasaaqaraasa mina ufa sia irimariasa afapita qumareenoo moodaanaki afapita rapidau inanoo faiqí fidika fannoo sauna tatira fara foommiannoo.

<sup>16</sup> Mina qamunnasaa faqa mina aikusaa faqa mina auqu moo maaqi qimasee akara rirafa Karaambaiquaqa karaambaiqa uriqararausa uriqararafa maridanoo.



17 Qinee Yoohaneesa mina qafamaseeqa quandaki qangiroo moo suanisaa kikiqinoo marina qafeeqa. Mifa aiqama ufini innaaruna ameemaanai nimariasa firaa kari nameera qimasee qimanniminoo qinau. Innee suqufiqa Anutuna firaa qoomaqa sakasee naaqa.

18 Innee suqufiqa karaambaiqauqa faqa sundiauqa faqa misa kiateenauqa faqa qoosauqa faqa minasaa akaraqa mariasa faqa aiqama fasiqa rumbee mariasa faqa iduki mariasa faqa kaiqeesa faqa uriqararausa faqa Anutufa misa aiqama narusainaqa misa nimaqi anireeqa Anutufa qoomaqa sakaseenoo misa nimaqi aniree naaqa.

19 Suanisaa maru qangiroofa miqi qimasoofoqa quandafi firaa rakirana qafaqiafana. Manda kaasau aandau faqa maa maqa maaqanasaa karaambaiqauqa faqa nari rakira sundiauqa moomoo faqa suqufi eekara qoosasaa marufa nari ammi sundia namufoqa naruannee qimasoofoqa rakirana uqeeraqau.

20 Qoosasaa marufa manda kaasau aandau uraaqaramafinoo rumba quqaseenoo inaaqianna kaasau aandau namufoqa rumba quqanau. Mi inaaqianaa kaasau andauna moo auqu unna qira tamummaqara fasiqa. Mi unna qira tamummaqarafa indaaruuqaa kaasau aandau oorisa faiqi sia auqaaqaa ira ainaina auquqoofa mi ainainnannai mifa faiqi anaasee nikaru qufaqa akaqausa niqinaaqa faqa nisauku uqannai faqa manda kaasau aandau akara maraqau. Akaqausa mi kaasau andaunara innaaru qimariqau. Eekara qoosasaa nimarufa

mifa kaasau aandau mareeqee unna qira tamummaqara fasiqa faqa kaqi kasi mariafaqa qumareeqee ida farumaki aqinau. Mi idafa firaqoo aurukandaa kandaa idanoo afunda mandaikammimarinau.

<sup>21</sup> Eekara qoosasaa nimarufa nari ookiqari ani maru qaseemafa kaasau aandau ammi sundiauqa faqa maa maqa maaqana karaambaiqa ammi sundiauqa faqa aiqama naru taikasooafa innaarunai ufiniuqa qumuree aiqama misa ni-maqi noofanoo nimuaqufaqa minnisaqau.

## 20

*Wan tauseenna aukwana Yisufa rakisiu ufafa.*

<sup>1</sup> Qinee Yoohaneesa miqimaruna qafamasee quandaki innaarunaindari qangiroo moo fannoo maqa ameemaanai kiqa faqa kisaafa sainanda faqa asaukuki uqirafa maqai quminau.

<sup>2-3</sup> Qumureenoo qaareena qumaranau. Mi qaareenna moo auqu ooqeenaa sakani moo auqu Sadannafa moo auqu afaanna. Mi qangiroofa qumureenoo sainandannai rumbaseenoo maqa ameemaanai madikaki afeeqa aquseenoo rookamandeenoo amusaraseenoo wan tauseenna aukwana minaki marianne qimasee quqanau. Mi kamuqoo sia maa maqa maaqanasaafaaraasa nikaruqiannoo. Mi wan tauseenna aukwana taikasainanoo Anutufa kafa idukusainanoo kaqikaaqoo kafa nikaruqiannoo.

<sup>4</sup> Qaareena rumbasoofaqa qaari moomoo innaarunai ufiqinoo maru qafaqafana. Minasaa ooqu mariqa marusara Anutufa innee faiqi

anaasee ufa iriaqee qinau. Qinee miquna qafeeqa quadakufaqa faiqi nimana moomoo qafaqiafana. Misa Yisuna anoona ufa faqa Anutuna ufa faqa kooroounara narusa nimana marufaqa nindafaqiafana. Misa sia manda kaasau aandau fee mina amanaree innaaru qimarusa mariqau. Misa manda kaasau aandau akara niqinaaqa faqa nisaukusaa faqa qaoo qimarusa mariqau. Misa kuqiranakiqari findi fiqa asauku mundirana saimbaqa karaambaiqaika mambiqa faiqi anaasee rakisifaranoo. Mi uan tauseenna aukuanna minasaimbaqa rakisifaranoo qinee qafaqiafana.

<sup>5</sup> Akaqausa kasooqagee wan tauseenna aukuana aiqarammafufanoo Anutufa inaaqiannaasa mara findifuannoo.

<sup>6</sup> Indaaru findifiraua Anutufa firaa asasirana niminaqa asasifaranoo. Inaaqianna findi firafa moo auqu inaaqianna kuqirafa mariannoo. Sia indaaru findifiraua urinaaqa-reefaranoo. Indaaru findifiraua Anutunaindi faqa asauku mundirana aanaiqikiraua maridaqa wan tauseenna aukuana Yisuna faqa faiqi aanaaseesaa rakisifaranoo.

*Sadannana nari aiku asauku faqa idaki aquaninna ufafa.*

<sup>7-9</sup> Mi uan tauseenna aukuanna aiqarainanoo Anutufa Sadanna nari rumberanakinaana idukusainanoo raudamakinoo aiqama maqasaa mariasa kafa nikaaruqiannoo. Nikaruqimaseenoo naarainaqa moomoosa uqanna anireeqa nukudara foora qumbiqa aqufifanoo Anutufa aidimari maqusana

Yeerusaree maqusa faqa Anutunara rimaria fasiqa anaaseesa faqa aiqama firaqoo rafusu quqarumasee nariraree qiannoo. Aiqama maqannaasa suqimarusera Kookana maqannaasa faqa Makookana maqannaasa faqee qimarifaranoo. Rakuane qimarufanoo innaarunaindari ida firaafa qumureenoo aiqama naru taikasoo faqa qinee qafaqiafana.

<sup>10</sup> Naru taikasoo fanoo Anutufa faiqi anaasee nikaru qimaru afaannana rafuseeqeenoo ida farumaki afunda manda marunaki aqinau. Sia nari kai, ooqai manda kaasau aanda faqa unna qira tamummaqara fasiqa faqa marunaki afaanna rafusu aqinau. Miqoo misa mari-daqa faasaana faqa eendaki faqa aupurarana maraidaqa naaru naaru marifaranoo.

*Anutufa taikara faasaana ufa qianinna ufafa.*

<sup>11</sup> Qinee Yoohaneesa miqiqufaqa qafamaseeqa quandaki qafaafananoo fira qaa ufiqirafa eekara arimarunasaa minasaa ooqumaru fasiqana faqa qafaqiafana. Mifa kooroo mafufanoo innaaruna faqa maqa faqa mina afusaaqari doo taikkeenoo taikafinau.

<sup>12</sup> Qinee miqoo qafaafananoo kuqirausa aiqama kuqiranaiqari findi fiqa Anutuna qaa aqa ufa qiraree qimasee kikiqiga mariqau. Uriqararausa faqa oorudupirausa faqa amana amana kai Anutuna oorisa kikiqiga. Innaarunai mariasa mi kuqirausa akara papiqa qairiseenoo nisaana riqau. Papiqa moo kaqi mariasa nuqu papiqa faqa qairisee qafanau. Anutufa mi papiqanakinaana misa manda

marirana nirana auqarana qafamaseenoo ufa mina amana kai niminau.

<sup>13</sup> Anutufa qufanoo ooruku nammari fannoo kuqirausa minaki marusa mareeqeenoo Anutuna afusaa quqasoofanoo kuqirana faqa maqa ameemaanai kuqirana faqa nariki maria kuqirausa mareeqee Anutuna afusaa quqaqau. Quqasoofanoo Anutufa aiqama nári mandainaina auqoona akiaqara ufa niminau.

<sup>14</sup> Kuqiranaki mariasa faqa maqa ameemaanai kuqiranaki mariasa faqa aiqama mareeqeenoo ida farumaki aqinau. Mi ida farumanaki aqimarianara inaaqianna kuqirane qinau.

<sup>15</sup> Aiqamausa asumu maraaninausa papiqaki nuqu marisa misa kaqi marifaranoo mi papiqanaki nuqu sia marinausa misa aiqama mareeqee kaqi kasi marufanoo ida farumaki aiqama aqinau.

## 21

*Fuka innaaruna faqa maqa faqa auquaninna ufafa.*

<sup>1</sup> Maa nauraa maqafa faqa innaaruna faqa ooruku nammari faqa doo taikanau. Taikafufanoo fuka innaaruna faqa maqa faqa ooqeenana amaaqa maqasoofaqa qafaqiafana.

<sup>2</sup> Qinee qafaafananoo Anutufa qufanoo fuka naaquqara maqusa fuka Yeerusaree innaarunaindari qumureenoo ooqeenaa Yeerusaree amaaqa maqafufaqa qafaqiafana. Fuka anaasee amundaranara foora afaaqa auqirafa fuka maqasaa quminau.

<sup>3</sup> Qumuroofanoo ufa moo fannoo Anutuna inaaruna qaarisaaqari maaqi qimasee firaa kari qinau. Doo maqee Anutuna maqusa faiqiki qumu maridanoo. Mifa misa faqa marinaqa misa mina faiqi anaasee marifaranoo. Anutufa nari uqanna misa faqa marinoo misa Anutufa mariannoo.

<sup>4</sup> Mifa aiqamausa naukunu rukaannoo. Sia kafaa kuqirafa faqa ikifaafau qirafa faqa iki-raqarafa faqa nidaqirafa faqa sia kafaa mifauqa mariannoo. Mi ooqeenaa ainainafa doo taikafinoo.

<sup>5</sup> Mi ufafa taikoofanoo qaarisaa marufa qini qimaqiminoo qinau. Doo qinee maqee aiqama ainaina fuka kai auqu quqaanaura. Maa ufausa akara rua, kuqaa anoona ufa maridanoo minasaa mundimaria ufafa maridanoo.

<sup>6</sup> Kafaa qimaqiminoo qinau. Doo aiqama ainaina taikeenoo. Qinee oosana araafanausa maridaqa taikaaninna aukuana faqaasa maridaqa. Nammariara nidimarisa fuka maqakiqari ururee mari nammarina, kaqi marira nammari asooarafa sia feefaurirafa kaqi nimianauranoo.

<sup>7</sup> Mandainaina rafaagafusee uriaaqararausa qinee maa ainainna nimianaura. Qinee misa Anutusa marianaura misa qini qimaakumara marifaranoo.

<sup>8</sup> Maparaa imariasa faqa ueeqee mariasa faqa kaaqa ufa rukiee mariasa faqa faiqi anaasee kuqa narimariasa faqa kaaqa faiqi aanaaseera rimariasa faqa aukainaina maraqa nuasa faqa tumunnai faiqi nimana auqusaida minara rufiasaida innaaru qimariasa faqa aiqama oosana oosana unna ufa qimariasa faqa mi

mandoosanna maraqa nuasa misa maqusai ida farumaki marifaranoo. Miqoo ida firaafa fasafasainoo mandundi marifa mariannoo. Mi idana auqu inaaqiannaa kuqirafa maridanoo.

*Fuka Yeerusaree anianinna ufafa.*

<sup>9</sup> Miqi qimasee qimaqimisoofanoo qangiroo moo fannoo qisauku dinni taikasee dinni ani qaara marasee marusakiqari aupurarana maqasaa teeqimariasakiqari moo fannoo aniree qimaqiminoo qinau. Yoohanee anee mai anirainaga auniriranasaa kuqu sipsipa anaqina mina anaaga amundarana ani uqafiqaanana qafa.

<sup>10</sup> Miqi qimasooofanoo Anutuna maraquna fannoo qini daakufufanoo qangiroo fannoo rafusueeqeenoo kisaaga aaganasaa quqaqisanau. Miqooqari naaquqara maqusa fuka Yeerusaree maqusa innaarunaindari Anutufinnaindari qumuna uqaqifiqanau.

<sup>11</sup> Qumimarufanoo faqa qumu marinanoo faqa minakiqari Anutuna kaaga areenarafa minakiqari takunasoosa imarinau. Mi fuka maqusafa pupu ooni tanukaidara foora qeemarinau.

<sup>12</sup> Mi fuka maqusana faandaamurafa ooninai auquqoofa marinau kisaaga amatooki kamminoo marinau minaki qisaukuqara taikasee qiku ooqu qaaraqanda marasee kooqi marinau, aigama kooqisaa qangiroo moo fannoo rakisimarinau. Mi kooqisasaa Isaraeena aiku asauku marusa qisaukuqara taikasee qikunni

ooqu qaara marasee nuqu mi kooqisasaa akara rinoo marinau.

<sup>13</sup> Suani oosana ururee maruqaannai faandaamurasaa qaaramoo kooqi mi qaannai marinau. Suani keegee maru qaannai qaaramoo kooqi marinau. Suani dinni ataagee qaannai qaaramoo kooqi marinau. Suani dinni ataagee qaannai qaaramoo kooqi faandaamurasaa marinau.

<sup>14</sup> Mi ooni faandaamurana oosanaki qisauku qara taikasee qikunni ooqu qaara marasee firaa ooniuga marinau. Mi oonisasaa sip-sipa aanaaqi Yisuna aiku asauku qisaukuqara taikasee qikunni ooqu qaara marasee marusa nuqu mi oonisasaa akara rinoo marinau.

<sup>15</sup> Mi qangiroofa qini qimaqimimaruna asaukuki ruraa koora auqimaruna uqusee mariunannai mi fuka maqusana faqa faandaamura faqa kooqiuga faqa amanamasee qafanau.

<sup>16</sup> Mi fuka maqusana ataageenni faqa mina sandaaqai faqa amana amana kai marinau. Aiqama tu tauseenna faqa maqi handareeta faqa (2,400 kilometer) mina kisaaga miqimaseenoo kisaaga uqanna mi maqusana ati faqa marinau.

<sup>17</sup> Mi fuka maqusa faandaamurafa faina maqa qufisara foora auqirafa marinau. Mi qangiroofa faandaamura maqasaqari ammuqunni amanamasee qafamaseenoo sikisti metera amana mardanoo fee qinau. Kisaaga uqanna marinau.

<sup>18</sup> Mi faandaamurafa pupu ooninnai auqirafa marinau, mi maqusanaki maaqauqa koorannai karasakiara foora ruqiaki qafee marufa idaaqirafa uqanna marinau.



19 Faandaamura oosanasaa firaa ooniuga marufa firaa feefauru agusaida maree maria ooniuga mi firaa oonisasaa afaaqa auqiilee mariqau. Faandaamura firaa ooniuga qisaukuqara taikasee qikunni ooqu qaaraqanda marara ooni mapukira ooni nifaaqa auqira ooniuga maridaqa, nuqu faqaa ooniuga mariqau.

Moo ooni afaaqa moo auqirafa mina auqu yasapeera marinau. Mifa saqari amanee arirafa amananda tanukaida qeemarufa marinau.

Moo ooni afaaqa auqirafa mina auqu akafata marinau. Mifa dirindaasi ariranasaa indiri ooni arirafa marinau.

Moo ooni auqu eemararada marinau. Mifa pupu ooni moo saqari amanee arirafa marinau.

20 Moo ooni auqu saradoonikisa marinau. Mifa pupu ooni moo eekara faqa saapaani oniarra foora irafa faqa marinau.

Moo ooni auqu kananeeriana marinau. Mifa taatuqee saapaani marinau.

Moo ooni auqu koosa marinau. Mifa pupu ooni moo tumana arirafa marinau.

Moo ooni auqu beerira marinau. Mifa arooqa ooni fooqaafa saqari amanee arirafa marinau.

Moo ooni auqu toopasa marinau. Mifa pupu ooni miqirafa tumana arirafa marinau.

Moo ooni auqu karaseedooni moo ooni marinau. Mifa pupu ooni miqirafa saqari amanee arirafa marinau.

Moo ooni auqu tookueesa marinau. Mifa ooni moo saqari amanee arirafa marinau.

Moo ooni auqu ameeetisa marinau. Mifa arooqa ooni miqirafa pannoona arirafa amananda qafee marufa marinau.

Faandaamura firaa oniuqara mapukira ooni fee qiqau misa nuqu miqiminoo maridanoo. Qisaukuqara taikasee qikunni ooqu qaaraqanda marasee marinau.

<sup>21</sup> Fuka Yeerusaree maqusa qikunni ooqu qaara marasee kooqi marinau. Aiqama kooqi faandaamurasaa maaqa kooqiara foora auqinoo marinau. Ooni fraana qumaree minaki ititee maru oonisa feefauru aqimari oonisa firaa oniuqa oonda fraana fooqaafa marufaqa qafaqifana. Maqusa qambaana faqa naambeeai faqa aiqama amiqira koorannai auqirafa amananda qafee marufa marinau.

<sup>22</sup> Qinee Yoohaneesa fuka maqusa Yeerusaree qafamaseeqa naaquqara amaana maqara randedeqa sia marifaqa qafeeqa. Amaana maqa mari-noofau fifau mariqini. Karaambaiqa Anutufa uriqararafa sipsipa aanaaqi Yisufa faqa miqoo akooqoo marunara amaana maqa sia marinau.

<sup>23</sup> Suani faqa quqoona faqa marinaqau qafani. Sia mari qafeeqa. Maridanoofau fifau mariqini Anutuna nari firaa areenarafa firaaqoo kaaqa qamaqinoo maridanoo, sipsipa aanaaqi mi maqusana qoomara foora maridanoo.

<sup>24</sup> Aiqama maa maqa maaqanasaaqaraasa mi maqusana kaaqa qaranasaa nifaranoo. Misa karaambaiqauqa nari amiqira ainainauqa mi maqusanaki munu quqeeffaranoo.

<sup>25</sup> Mi maqusa kooqisa aiqama faasaana atu-anoo kai mariannoo eendaki faqa sia ititefara-

noo, sia eenda mariannoo kaaqa qarafa kai mariannoo, minara kooqi sia ititaidaqa.

<sup>26</sup> Aiqama maqa maaqasaa mariasa misa amiqira ainaina faqa misa uriqarara ainaina faqa maree aniree mi maqusanaki fuka Yeerusaree maqusaki kai quqeefaranoo.

<sup>27</sup> Sia moo manda ainaina fannoo mi maqusanaki keeqaannoo. Sia moo asaurira ainaina auqee mari fee unna ufa qimari fee sia mi maqusanaki keeqeefaranoo. Sipsipa aanaaqi fannoo maqasaaqaraasa narí papiqaki nuqu akara rumaqaisa misa kai mi maqusanaki keeqeefaranoo.

## 22

### *Kaqi marira nammariara qimaqoo ufafa.*

<sup>1</sup> Mi qangiroofa fuka Yeerusaree maqusa uqaqifiqaseenoo nammari miqoo maruna uqaqifiqanau. Mi nammarifa Anutuna faqa sipsipa aanaaqi Yisuna faqa maru qaarinakiqari qumuree fuka maqusa qambaana ooqu fimarinau. Mi nammarina auqu kaqi marira nammari fee qiqau. Amiqira nammari sia dumuna maqa maru nammarifa mi nammarifa mookoofa amanee kai randaida qumidanoo.

<sup>2</sup> Mi nammarina dinni dinni afai saqari kambiqanoo maridanoo. Mi saqarisa aiqama quqoonasaa qaqamma iraidanoo kai maridanoo. Mina amanee aiqama maqannaasa aurirana teeroo taikannisee marifa mi saqari amaneefa maridanoo.

<sup>3</sup> Moo ainainara Anutufa aqurarainna ainaina sia mi fuka maqusanaki mariannoo, doo taikafuannoo. Anutuna qaari faqa sipsipa aanaaqi qaari faqa mi fuka maqusanaki maridanoo mina aiku asauku mi maqusanaki mariasa mina amooqifaranoo.

<sup>4</sup> Misa mina oori qafeefaranoo misa niqinaaqa mina auqu akara rinoo mariannoo.

<sup>5</sup> Mi maqusanaki asukuna taikanoo maridanoo sia kafa mariannoo. Misa sia qoomara suaniara iridaqa fifau maridaqa, Karaambaiqa Anutufa misa qooma marinaqa miqooqaraasa karaambaiqara foora naaru rakisi nimaqeeferanoo.

*Yisufa doo qumuaninna ufafa.*

<sup>6</sup> Mi qangiroofa mi ainainausa uqaqifiqaseenoo qimaqiminoo qinau. Mi ufausa aiqama qimamunafa kuqaa minasaa mundimariafa marifaqa qimamiqa. Karaambaiqa Anutufa nari maraqauna tamummaqara fasiqauqa nimirifa nari qangiroo niqiqaiifaqa mina ainainira fasiqa aanaaseesa qusasaa kambiqaaninna ainainausa uqannifiqaanifeera mi ainainausa ani uqafiqeeqa.

<sup>7</sup> Yisufa inniara maqasaa mariasara maaqi qidanoo, qinee qusasaa kafa ooqu fuanaura. Maa papiqanakinaa ufa irisee mi mau fimariasaa misa asasifaranoo.

<sup>8</sup> Qinee Yoohaneesa mi ainainna aiqama qafamasee iriseeqa daaquqoofaqa uqaqifiqee mari qangiroona aikuki maqasaa aqufiqa

amooqianeeriafananoo mifa qaoo qimasee qinau.

<sup>9</sup> Oo sia miqia Anutuna kai amooqia. Qinee ani faqa moodaa ainaini marunausa maridaqa ani afasausa tamummaqara fasiqauqa faqa moodaa ainaini marunausa maridaqa. Maa papiqanakinnaa ufamau fimariasa misa faqa moodaa ainaini marunausa maridaqa. Sia qini qimooqia Anutuna kai amooqia.

<sup>10</sup> Mi qangiroofa kafa qimaqimino qinau. Yoohanee anee maa papiqanakinnaa ufa tamummaqara ufa maridanoo sia qumeeraa, qimannimia. Aiqama maa ainainausa qusasaa kambigaannoo sia amana quandasee kaifaa kisaagasaa fuannoo, qusasaa doo kambigaannoo.

<sup>11</sup> Anaaseera fanandirana, faiqira fanandirana, miqida nariara nariara rimariasa saina miqidaqa mariaqa, mandoosana mandoosana maree mariasa saina miqidaqa mariaqa. Amiqira oosana maree mariasa saina miqidaqa mariaqa. Maparaammasee amiqira oosana firaqoo maree mariasa saina miqidaqa mariaqa.

<sup>12</sup> Doo iriaqa Yisufa inniara qidanoo. Qinee qusasaa ooqufuanaura. Innee maree marianna akiqara uqirausa doo ooqu fiqa muqu nimiranoo.

<sup>13</sup> Qinee oosana aroonakiqari marunausa maridaqa. Qinee taikaaninna aukunna faqaasa maridaqa.

<sup>14</sup> Nári qamunanda nammari uqusee anukara qamunna faqaasa misa kai amana fuka Yeerusa-

ree maqusa kooqiki keeqafiqa kaqi naaru marira saqari qaqamma amana diqisee neefaranoo. Miqimariasa asasifaranoo.

<sup>15</sup> Mi maqusana aqoosai kaaqa ufa rukiee mariasa faqa aukainaina maraqa nuasa faqa faiqí anaasee nariara nariara fanandi mariasa faqa faiqí anaasee kuqa narí mariasa faqa saqarinnai faiqí nimana auqusaida innaaru qimariasa faqa unna oosana auqimariasa faqa unna ufa qimariasa faqa misa aiqama aqoosai marifaranoo.

<sup>16</sup> Qinee Yisufa maa ufausa amaana maqaki keeqee mariasa qimannimiagee qimasee qeeqa qangiroo aqiqqeqa. Qinee Dafidina oosanakiqari minati maridaqa. Qinee kananaana duqudeeqiara maqi kaaqa qeemarunausa maridaqa.

(Yisuna saqariki mariasa aiqama mina aqoonausara foora mariafanoo misara Yoohaneefa moodaanaki sipsipa aanaaqi Yisuna anaqa fee qidanoo maa papiqanaki qidanoo.)

<sup>17</sup> Anutuna maraquna faqa sipsipa aanaaqi Yisuna anaqa faqa aiqamausara mai aniaqee qidaqa. Aiqaama maa ufana irimariasa innee faqa quandafi niqoonausa naaraqa aniaqee qi-aqa. Yisufa naaru marira nammari nimianee qidanoo. Aiqaama nammariara nidimarisa doo aniree naqa. Sia feefaurifaranoo, nidimarin-ausa kaqi naqa.

### *Taikara ufa.*

<sup>18</sup> Qinee Yoohaneesa aiqamausa maa papiqanakinnaa tamummaqara ufa irimariasa doori kandamasee aaquqimannimaqaidaqa faiqí moo fannoo maa papiqanakinnaa ufa

moo narí ufa minasaa ootupamasee qinafa mina akiqara Anutufa maa papiqanakinaa aupurarana narirana mara mi fasiqana ariranasaa ootupainanoo firaanaikiannoo.

<sup>19</sup> Kafa faiqí moo fannoo maa papiqanakinaa tamummaqara ufa ati rafaqafinannoo minara mi fasiqafa naaru marira saqari qaqama neemariana Anutufa rafaqafuannoo sia naannee qiannoo mina naaquqara fuka maqusaki keeqararara faqa Anutufa rafaqafusee qaoo qiannoo. Maa papiqanakinaa ufamau sia fuanara qaoo qiannoo.

<sup>20</sup> Qinee maa papiqanakinaa ufa qima afeekaikammannimi marunasa Yisusa maaqi qimasee qimannidaqa kuqaa uqanna qinee qusasaa innee iannai kaifaa ooqu fuanaura. Qinee Yoohaneesa minara maaqi qidaqa. Oo karaambaiqa Yisu doo qumuannee qidaqa.

<sup>21</sup> Karaambaiqa Yisuna amiqira afaarirafa inni aiqamausaki mariani.

**Fúka Moodaanaki Kira Ufa Afaqínaasa Ufa**  
**Portions of the Holy Bible in the Binumarien**  
**language of Papua New Guinea**  
**Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698